


R. P.

CLAV
AQVAV
SOCIETATIS
PRÆPOSITI GE
INDVST

*Pro Superioribus ejusd
ad curandos anim*



ANTVER
Apud JOANNEM I
M. DC. XX
SUPERIORVM PE

4
R. P.

CLAVDII

AQVAVIVÆ

SOCIETATIS IESV

PRÆPOSITI GENERALIS

INDVSTRIÆ

*Pro Superioribus ejusdem Societatis
ad curandos animæ morbos.*




ANTVERPIÆ,

Apud JOANNEM MEURSIUM,
M. DC. XXXV.


SVPERIORVM PERMISSV.

THE
LIBRARY
OF THE
MUSEUM
OF
COMPARATIVE ZOOLOGY
AND ANATOMY
OF THE
HARVARD UNIVERSITY
CAMBRIDGE, MASS.



1895
JAN 10 1895
RECEIVED
FROM THE
HARVARD UNIVERSITY
LIBRARY

A D
SVPERIORES
SOCIETATIS.

VM satis perspectum
esset R. P. N. quanti
ad Divinum obse-
quium, Societatis utilitatem,
& auxilium animarum inter-
sit, Superiores idoneis ad rectè
gubernandum præceptis institu-
tisque abundare; Varias sub-
inde in eo genere Ordinatio-
nes ac monita suggessit, prout
occasiones & tempora po-
stulabant. Sed cum impensius
huius rei necessitates ac mo-
menta secum perpenderet, vi-
deret-

deretque non posse unumquemq;
quantam par esset, experien-
tiam lucemque rerum consequi,
præsertim ob crebras mutatio-
nes, quæ peracto triennio fieri
nunc debent; operæ pretium ac
propè necessarium duxit, ad pe-
culiarem aliquam Institutio-
nem descendere: cùm certum sit,
nullam esse artem, in quâ peri-
culosius & graviore aliorum
malo peccetur, quàm in hac quæ
ad spiritualem curam pertinet
animarum. Quare cùm me-
minisset à P. Polanco Beati
Patris Nostri mandato atque
ductu, ad usum doctrinamque
operariorum nostrorum, qui
in missionibus versantur, In-
stru-

structiones quasdam editas
olim fuisse , Industriasque
appellatas; haud abs re , quin
multò etiam congruentius fo-
re existimavit , si Indu-
striæ item aliqua , ad rectam
gubernationem ducentes , So-
cietatis Superioribus trade-
rentur. Quo factum est , ut
pro singulari desiderio , quod
ei Dominus indidit felicitis pro-
gressus atque augmenti Socie-
tatis , subcesivis inter assi-
duas occupationes suas inter-
vallis , hasce Industrias in il-
lorum gratiam dictârit. Quæ
cùm Patribus Assistentibus ,
aliisq; nonnullis qui eas vide-
runt, probata adeò fuissent , ut

*non mediocrem iis uti scientibus
utilitatem allaturæ viderentur,
è re futurum judicatum est, si
universæ Societati communi-
carentur, eaque typis excusæ,
quales nunc mittuntur, quò
plura & emendatiora essent ex-
emplaria. Faxit Divina boni-
tas, ut res tota eum fructum
fortiatur, quem R. P. N. sibi
proposuit, & quem enixè om-
nes optamus. Datum Romæ
15. Aprilis. 1600.*

Mandato R. P. N. Generalis,

BERNARDUS de ANGELIS
Secretarius.

INDEX CAPITVM.

D E iis qua necessaria sunt ad orationem rectè faciendam. Cap. 1.	pag. 11
De suavitate & efficaciâ in gubernatione conjungendi. Cap. 2.	21
Ariditas & distractio in oratione, & rebus devotio- nis desolatio. Cap. 3.	29
Languor & debilitas in spirita & virtutibus. Cap. 4.	40
Difficultas & repugnantia in obedienciâ. Cap. 5.	46
Effusio ad exteriora, sive ex ariditate internâ, sive ex quadam inquietudine. Cap. 6.	49
Amor excellentiæ & honoris, vanitas, unde plurimi defectus, excusatio & defensio in culpis. Cap. 7.	53
Inclinatio ad sensualitates, amicitias, otiositates, & scurrilitates. Cap. 8.	56
Profunditas & defectus claritatis, ita ut nec ipsi se aperiant, nec intelligantur, & deferri gravatè ferant. Cap. 9.	60
Iracundia & impatientia, vel subita & frequentes, vel diuturna aversiones. Cap. 10.	64
Laxitas in observatione regularum, & libertas; de- nique conscientia minimè timorata. Cap. 11.	69

INDEX CAPITUM.

<i>Imaginatio infirmitatis, aspirare ad quietem, & recusare ministeria. Cap. 12.</i>	75
<i>Tentatio contra Institutum, & aliquot Regulas quæ non placent. Cap. 13.</i>	80
<i>Tentatio contra Superiorem, cum aversione & diffidentia. Cap. 14.</i>	87
<i>Secularitas, & vultuositas, insinuans ad familiaritates & gratiam externorum. Cap. 15.</i>	97
<i>Pertinacia & durities iudicii, cum contentione. Cap. 16.</i>	100
<i>Perturbatio pacis, & seminatio dissensionis & iurgiorum. Cap. 17.</i>	102
<i>Melancholia, scrupuli, & angusta conscientia. Cap. 18.</i>	116

R. P.

C L A V D I I

A Q V A V I V Æ

S O C I E T A T I S I E S V

P R Æ P O S I T I G E N E R A L I S

I N D V S T R I Æ

Pro Superioribus ejusdem Societatis
ad curandos animæ morbos.

P R O O E M I V M.



N I M A R V M curatio quantò *Animarum*
præstantior & difficilior est, *curatio quan-*
quàm corporum, tantò majore *tò præstan-*
rem à nobis exigit & sollicitu- *tior, tantò*
dinem & peritiàm. Et anxietates *difficilior.*
quidèm ac pericula hujus muneris non vi-
demus tantùm, sed & prædicamus & plangi-
mus quicumque sub hoc onere laborantes in-
gemiscimus. Verùm an æquali studio conten-
damus,

*Plurimorum
sanatio fit
per patientiam.*

*Medicina
spiritualis
præcepta.*

damus, ut industriâ pervigili, & infatigabili caritate, susceptos nostros optatæ sanitati reddamus, hoc nobis magnoperè perpendendum, & ut id præstemus, in primis curandum est. Et mihi quidem frequentior quædam & attentior meditatio, & experientia diuturnior certissimè persuasit, plurimos ad salutem reduci posse, si paternâ quâdam, & plenâ amoris ac fiduciæ patientiâ res agatur; quos ex neglectâ aut perfunctoriâ medicinâ vel incorrigibiles excludimus, vel toleramus incorrectos. Quamobrem non inutile visum est futurum, si quæ sedulâ observatione tot annorum spatio deprehendi, in quibus me vel alios peccasse animadverti, quæ rectè, quæ secus acta essent, adnotando; quid profuisse, quid contrà nocuisse cognoverim, ea quibusdam quasi medicis præceptis quàm brevissimè planissimeque digererem. Sic enim fieret, ut & iis qui in gubernatione, id est, arte hujus spiritualis medicinæ non adeò versati sunt, plurimum lucis & adiumenti adferretur; & eorum qui ex unctione sancti Spiritus, lectione Sanctorum, & experientiâ, iis auxiliis non egerent, memoria non leviter juvaretur, & voluntas ac studium vehementiùs excitaretur.

De iis quæ necessaria sunt ad curationem rectè faciendam.

CAPUT I.

I **V**T autem rectè & cum utilitate morborum curatio fiat, plura necessaria sunt, quæ vel medicum ipsum, vel infirmum spectant. quæ breviter attingentur. Et ante omnia, unum illud ob oculos versandum assiduè, quâ obligatione Deo nos in hujus muneris susceptione obstrinxerimus, ut (juxta Prophetam, vel potius ipsius Domini vocem) quod infirmum est consolidemus, &c. Vnde egregiè B. Rasilus, cùm quæsisset, quâ animi affectione Superior aliorum curam suscipere debet, Reg. fusl. di-respondet: *Vt qui sauciis multis ministrat, & san-* sp. ut. resp. 30.
niem de singulis illorum vulneribus abstergit, & pro naturâ uniuscujusque mali remedia ei adhibet ac commodata; munere illo neutiquam ad animi elevationem uti consuevit, sed ad demissionem potius, & sollicitudinē, & majorem quamdam curam; itidem ac multò etiam magis is cui totius Fratrum societatis sananda provincia est delegata, perinde ut qui omnium minister sit, & rationē de unoquoque Ad Hebr. 13.
illo-

Cogitanda Superioris obligationis.

Ezech. 34.

Reg. fusl. di-
sp. ut. resp. 30.

Superior est spiritualis medicus.

Ad Hebr. 13.

12 *Industria ad curandos animæ morbos,*

illorum redditurus, sic secum agitare animo, & contendere anxie debet. Hæc D. Basilius. Assiduâ quippe industriâ & vigilantîâ opus est. nec abs re apud Cassianum è corporali medicinâ translato vocabulo, hi quos spiritualiter curandos suscipimus, *Suscepti* nostri vocantur, quasi quos in nostram fidem susceperimus nostrumque periculum. Videat ergo Superior quasi rationem Deo redditurus, quid faciat, quid caveat: hoc enim reverà valdè excitandi sumus, ne putemus nos innocentes, cùm nihil committimus.

2 Hoc veluti fundamento posito, sciens quia Domini est salus, & illius spiritu lux & vita & bona omnia in cordibus fidelium procreantur; non suæ prudentiæ aut diligentîæ innitatur, sed ad orationem per se & per alios confugiat; nihil enim exterior correptio operatur, nisi interior loquatur excitator. Quamobrem D. Gregorius de eo, qui præest, & alios ad DEUM compellere studet: *Tanta charitatis, inquit, esse debet, ut instanti desiderio non petitor, sed petitio asse sentiatur: salutem quippe fidelium tam instanter debet appetere, ut ex usu interni gustus, omnem motum cordis in affectam ducat supplicationis.* Et B. Iob, ut Cassianus annotavit, quotidianâ pro filiorum purificatione sacrificium Domino Deo offerebat, non tam sibi eos, quàm Deo susceptos ac familiares cupiens exhiberi.

Lib. 10. c. 7.
Spiritualiter infirmi suscepti dicuntur

Psal. 3.
Ad orationem confugiendum.

In 1. Reg.
lib. 5. c. 3.

Iob. 1. Collat.
6. c. 10.

3 Recogitet magno & fidenti animo, quamvis verissimum sit, quod S. Leo monuit, antiquorum morborum difficilem ac tardam esse curationem; nihilominus certissimum esse quod docuit S. Basilus, nihil esse in rerum naturâ, quod diligentia non corrigatur; neque vitium esse adeò grave, quod Dei timore non pervincatur. Quin etiam idem alibi, naturalium rerum exemplo probat, multò magis quæ ex voluntate oriuntur, vitia posse emendari. Cùm enim narrasset punicas acidas, amigdalasque amaras, agriculturalum curâ in dulces verti posse, si pinguem ex pino cuncum per mediam medullam adactum susceperint; infert: *Nemo igitur in vitio constitutus homo de se ipso desperare velit, haud nescius, agriculturam stirpium qualitates mutare; curam autem, ac studium in consequendis virtutibus, animi omnes vincere morbos superareque posse.* Non igitur deiiciendus animus, neque ex rei difficultate, aut morbi magnitudine, vel nostrarum virium imbecillitate metienda res est, sed in verbo Domini cum patientiâ & spe ad curationem accedendum.

4 Sed illud præcipuè difficultatem parit, quòd cùm in morbis corporis is maxime morbum cognoscat & sentiat, qui patitur; isque omnium maxime sanari cupiat, medicum accersat, & desiderio sanitatis nullum, quamvis amarum atque ingratum, refugiat

*Perpendat
nihil esse in-
curabile.*

*Reg. fuf. di-
sp. resp. 10.
Hexam.
homil. 5.*

*Difficultas
ex infirmi
voluntate
quomodo
curanda.*

refugiat medicamentum ; in animâ contrà omnino evenit , ut infirmus præ omnibus morbum ignoret, medicum refugiat , & curationem difficilè admittat. Verùm in eo præcipua curationis industria debet elaborare , ut ille morbum agnoscat. Cui primò suadendum, quod D. Basilii docet, peritos medicos habere signa quædam latentium morborum, qui interdum alios & ipsum infirmum latent : quare illis potiùs credendum , cùm præsertim superbia & amor proprius in infirmitatibus nostris agnoscendis gravissimè impediunt. Deinde ad examina diligentiora perurgendus , tum signa quædam illi indicanda , quæ negare non potest ; quamquàm talis morbi signa esse non novit, vel non advertit. Postremò hortandus seriò ad orationem , quippe ex defectu luminis & sensus spiritualis id provenit. Videat quàm longè sit à salute , qui nec morbum agnoscit: proinde si non sentit, credat: neque enim ut in corporibus , si morbo illo carentes pharmacum aliquod sumamus , nocet potiùs ; ita etiam in animo evenit, cùm actus mortificationis & abnegationis sui ipsius fructus & virium incremento carere non possint. Sumat è Scripturis (juxta Basilii consilium) & speculum, unde videat tædositatem mali , v.g. iracundiæ, superbiæ , detractionis , &c. & morbo suo convenientia medicamenta. Dico, inquit,

*Agnosendus
est morbus.*

Reg. Brev. .
Resp. 28.

*Modum inda-
gandi mor-
bum.*

Homil: in
aliquot Scri-
pturæ locos 6.

quit, hic meus est morbus, ut is qui ad medicū accesserit, & variis contenta tabellis pharmacā viderit, considerat, quid sibi conveniat; ita faciendum suadet & illi, sed multò magis ut medico ipso commonstrante, & morbum certius agnoscat, & medicamentum securius assumat. Et sanè de voluntate, & desiderio qualicumque sanitatis ambigendum non est. Quis enim ita sit amens aut deploratus, præsertim qui sæculo relicto Religioni se devovit, ut sanari non cupiat? Sed deest efficacia, quæ medicamenta quāvis amara suscipere compellat. Itaque prudenti medico id curandum, ut partim ipsius ostensione morbi, partim captatâ opportunitate, partim etiam agendi facilitate, & communicatione suavi, denique medicamentorum lenitate, vel ipsorum propriâ vel condimentis aliis ascitâ, variatis etiam interdum applicandis, difficultates hujusmodi omnes accuratè, sed patienter tamen, leniat. Nec desperandum quin humorum sensim cruditate mitescente, incipiat minùs respuere medicamenta quæ horrebat. Interim autem dum respuir (quoniam voluntatis vitium est, quæ mutari potest) sciat Superior hoc ipsum ad medicum pertinere, laborare, ut ille velit: quæ difficultas si semel sublata, vel certè temperata fuerit, videbit quotidie, magnâ cum animi lætitiâ, sanitatis & roboris incrementa.

*Superioris
dexteritas
difficultates
superat.*

*In Superiore
novem requi-
runtur quæ
aromatum
nomine expli-
cantur.*

*Serm. 2. in
refur. ad
Abbatēs.*

5 Hæc ad Fratris bonum ut efficaciter præstare possit, omnino necesse est, ut emat aromata, id est, ut habere studeat, quæ ex parte ipsius requiruntur. Hæc autem egregiè sub typo aromatum explicat D. Bernardus. Sunt, inquit, aromata mentis, linguæ, & manus. Et mentis quidem sunt tria, Compassionis affectus, Rectitudinis zelus, Discretionis spiritus. Habeat, inquit, mens nostra spiritum discretionis, ut miscens aptè temporibus tempora, opportunè æmulari, & nihilominus ignoscere queat. Linguæ item tria, modestia in increpando, copia in exhortando, efficacia in persuadendo. Manus etiam, id est, in exemplo tria, Continentia in carne ab omni voluptate, misericordia in fratre, patientia in pietate. Quæ videnda diligenter apud eum Ser-mone ad Abbatēs, nam hîc tantum satis fuerit attigisse. At quàm necessaria sunt Superiori ad utilem correctionem, tam vigilanter quærenda, nisi frustrari velimus.

*Medicamen-
torum con-
gruitas.*

6 His porrò præfidiis instructus, manum operi admoveat, & medicamenta apponat congruentia pro cuiusque morbi qualitate, contraria scilicet contrariis curans, ut nostra Constitutio docet de superbiâ, & aliis pravis animæ propensionibus: & accuratè S. Basilii, Inanem gloriam, inquit, abjectioribus exercitiis imponendis; futilem & otiosam loquacitatem, silentio; immodicum somnum, vigiliâ

*Reg. fus.
disput.
Resp. 51.*

vigilia & exercitiis orationum ; segnitiam corporis , laboribus imponendis gravioribus ; edacitatem indecoram, jejunio ; murmurationem, à reliquis segregatione, &c. Sed id semper studeat, ut hæc omnia non tam quasi à Superiore profecta, quam à se ipso suscepta infirmus accipiat. Qui sibi perluadeat , si strenue rem aggrediatur , atque ut decet eum qui serio sanari velit ; fore ut citius se relevari sentiat quam putarat ; & quod de sapientiæ fructibus Sapiens dixit, experientia comprobet : *In opere enim illius exiguum laborabis, & cito edes de generationibus illius.* Videat tamen sapiens medicus, ut opportuno tempore id faciat , & imitetur corporis medicos. Nam S. Gregorius Siagrio Episcopo postquam dixisset, illos medicamenta quædam recenti adhuc confectione formata non offerre infirmo , nisi opportunitate temporis macerentur , subdit : *Nam si immature quis dederit, dubium non est, quin sit causa periculi, res salutis.* Nec tamen propterea ab omni medicamento absteineat, sed , ut iidem illi faciunt, adhibeat aliqua leniora , & à quibus infirmus non ita abhorreat: addat abstinentiam à rebus nonnullis , injiciat subinde majorem sanitatis cupiditatem : denique dilatio quædam , & pia moderatio sit hæc intermissio, non curæ neglectus, quod maxime nocet. Sunt enim plerique Superiores , qui quod videant subditum esse minus dispositum , non tam in opportuniore

Eccli.6 10.

Opportunitas.

Lib.7.epist. 110.

tempora differunt medicinam, quam negligunt. Sed de his in sequentibus.

*Ne decipiat
tur si putet
se amare in-
firmum, cum
specie suavi-
tatis medi-
camenta non
adhibet.*

Lib. 13.
Moral.

Collat 6.
cap. 6.

Lib. 7. epist.
112.

7 Caveat autem diligenter, ne specie quadam suavitatis deceptus, aut naturali quadam timiditate, abstineat à curatione: sed intelligat & subinde recogitet se tunc magis diligere infirmum, majorique erga illum suavitate uti, si, ut loquitur sanctus Gregorius, non parcens parcat: *Quia, inquit, dum correptionis verbum non distulit, citius hunc à culpa liberavit: libere enim arguens non pepercit, sed in eo quod correxit, pepercit.* Quid enim hac misericordiæ specie crudelius, qua fit ut & morbi augeantur & incrudescant, & qui lenissime curari poterant, jam indigeant ferro, & aliis membris contagium vel periculum creetur, & toti corpori nostra socordia noceatur. Nec terreatur, si quando amariora videri possint infirmo, quæ sunt applicanda; quia non tam illius sensus, quam salus exquiritur. *Etenim sectio vel ustio salutaris, Cassianus inquit, quæ illis qui ulcerum contagione putrefacti sunt, pie infertur à medico, mala à tolerantibus creditur: nec equo calcar, nec emendatio suavis est delinquenti.* Quin etiam addit Beatus Gregorius, futurum, ut illi ipsi cui amara fuit ad tempus aliqua prohibitio, postmodum ex ipsa animi utilitate dulcescat, si undè inimicus superare potuit, superetur. Sed ut sint amara infirmo medicamenta, qui curat tamen, & facit quod suum est, quodque prætermittere

mittere sine culpa non potest, & ex caritate facit ac desiderio salutis illius, quem alioqui contristat invitus; & in oculis Patris cuncta videntis, ejus filio consulit, quem curandum ab eo suscepit.

8 Sed antequam infirmum aggrediatur, curationem adhibiturus, meditetur attentius, & perpendat diligenter qualitatem morbi, corporis complexionem, & ut S. Gregorius loquitur, conspersionem, id est, an sanguineus & hilaris, an melancholicus & tristis, an cholericus & præceps, an lentus sit & remissus. Deinde tempus, quo duravit infirmitas: tum quæ remedia fuerint applicata: quid profuisse, quid nocuisse deprehensum sit: quinam ex domesticis juvare curationem, qui contra possint impedire, ut ex iis omnibus juvari commode possit.

Qua perpendenda antequam curationem aggrediatur.
Lib. 29.
Mor. c. 14.

9 Sed ante omnia examinet Superior se ipsum, tum ut sese humiliet, & majori confusione & suavitate id faciat; tum ut hoc modo talis fiat, quo Dominus ad filii sanitatem aptiore & expeditiore uti valeat instrumento. Quod faciendum omnino suadet Sanctus Gregorius, *Consideremus*, inquit, *quia aut tales sumus, quales nonnullos corrigimus; aut tales aliquando fuimus, etsi jam divina gratia operante non sumus: ut tanto temperantius humili corde corrigamus, quanto nosmetipsos verius in his quos emendamus, agnoscimus.* Hoc autem dici non potest, quantum vel ad

Superior se ipsum examinet, & humiliet, quo fructuosius corrigat.

Lib. 23.
Moral. c. 8.

meritum, vel ad modum correctionis momenti habeat.

*Morborum
spiritualium
genera, de
quibus agi-
tur, sexde-
cim.*

10 Morborum porro spiritualium genera, sexdecim veluti capitibus comprehendere placuit; quibus singulis commoda medicamenta indicantur. Curavimus autem primum quod in medicis præcipue landatur, ut facilioribus & suavioribus uteremur pharmacis, & quæ salutem non tam acrimonia promitterent, quam suavitate præstarent. Deinde, ut non aliunde, aut non longe petitis; sed iis ipsis veluti simplicibus, ut vocant, quæ in domesticis hortis, id est, nostris Constitutionibus enascuntur. Et quoniam Superiorum plerique & viri alii graves flagitarunt aliquando, & nunc denuo instantius urgent, ut de suavitate & fortitudine in gubernatione conjungendis, aliquid explicaremus (putant enim nonnulli, id fieri vix posse, quod suavitas in laxitatem, & fortitudo plerumque, aliquorum vitio, degeneret in rigorem) de hoc etiam proprio capite brevissime aliquid censuimus attingendum, cum cetera omnia medicamenta, nisi hæc duo prudenter conjungantur; aut suavitate aut efficacia, id est, fructu ipso correctionis omnino sint caritura. Utinam ad majorem Dei gloriam, & Societatis utilitatem cedant.

De suavitate & efficacia in gubernatione
conjungendis.

CAPVT II.

1 **R**ATIONEM gubernandi, (eos præfer- *Ratio spiri-*
 tim qui voluntarium sese Deo sacrifi- *tuales viros*
 cium obtulere, & spontanei, ac spiritu alacres *gubernandi*
 per mortificationis quidem & abnegationis *fortis &*
 studium ad perfectionis plenitudinem diri- *suavis.*
 gendi & urgendi sunt;) fortem ac suavem de-
 bere esse, non modo constans sanctorum Pa-
 trum ubique docet auctoritas, sed nostræ et-
 iam Constitutiones, Beatique Patris nostri &
 monita & exempla copiose docent. Verum *Difficilis*
 qua ratione practice hæc duo conjungi pos- *harum*
 sint, hoc fatentur multi se facile non videre. Si *praxis.*
 enim summo jure agatur cum subditis, ut qui
 perfectionis viam profitentur nihil omittant
 eorum quæ spiritualis perfectio postulat, vix
 fieri posse videtur, (cum caro & humana fra-
 gilitas, spiritus desideria non valeat æquis pas-
 sibus consecrari) quin is regendi modus ab
 optimo quidem zelo profectus, non tamen se- *Rom. 10.*
 cundum scientiam, ut qui humanæ imbecilli-
 tatis obliviscatur, asper & plane intolerabilis
 evadat. Rursum si humanæ infirmitatis imbe-

22 *Industriæ ad curandos animæ morbos.*

Gal. 5.

Iob 14. 19.

Matth. 16.

Luc. 9.

*Quid Superi-
ori pra-
standum ut
utramque
assequatur.*

cillitatem intueamur; & iis quæ caro concupiscit adversus spiritum, fraternæ compassionis prætextu facile assentiamus; quis non videt (quoniam, ut Scriptura loquitur, *alluvione paulatim terra consumitur*) futurum, ut tepidos atque carnales homines habeamus, in quibus non tam abnegationis & crucis (quod tamen religiosam vitam esse, & S. Basilii pulchre docuit, & ceteri omnes spirituales magistri à CHRISTO Domino prima veritate edocti tradiderunt) quam sensualitatis & propriæ voluntatis spiritum nutriamus? Quid igitur faciendum Superiori, ne vel fortitudo in asperitatem, vel suavitas in languorem & relaxationem degeneret? Hoc, quantum experientia & observatione deprehendere potui, brevissime explicabo. Quod ut dilucide fieret & paucis, illa mihi methodus commodissima visa est, si capita quædam attingerem, ad quæ omnis fere gubernandi asperitas & durities reducitur: itemque nonnulla, ex quibus contra omnis laxitas derivatur: ac denique si quomodo, facta extremorum comparatione, medium tenendum sit indicarem.

*Insuavis gu-
bernationis
capita,
Rei injuncta
impossibili-
tate.*

2 Quæ igitur gubernationem insuavem reddunt & asperam, hæc fere sunt. Primum, in rebus injungendis, si res ipsa quæ imponitur, gravis sit & importabilis: quod nonnumquam ex Superioris vel discretionis inopia vel tenuitate judicii poterit evenire. Secundum, quod

quod frequentius continget, si res non sit illa *Defectus vi-*
quidem in se ardua; sed is cui injungitur, cor- *rium.*
poris aut animæ viribus ad id oneris ferendum
destituatur. Tertium, si quidquid illud sit, *Modus asper*
quod injungitur, id fiat verbis asperioribus, *injungendi.*
modoque despotico, præsertim vero si suspi-
cari quis possit, id ab aliquo immoderato Su-
perioris affectu proficisci. Quartum, si urgea- *Executio*
tur executio eo tempore, quo subditus non est *tempore non*
probe dispositus, nec detur illi tempus & au- *opportuno.*
xilia, ut se ipse disponat. Quintum, si tam gra- *Levis &*
viora, quam leviora eodem omnia exigantur *gravi ea-*
ardore; imo aliquando leviora etiam majore, *dem exactio.*
quod consona sint peculiaribus quibusdam
sensibus ejus qui gubernat. Sextum, si omnes *Subditus in-*
subditi rationes & excusationes primo statim *auditus.*
aspectu tamquam tentationes, eo benigne non
audito, rejiciantur. Septimum, si se suspicio-
sum Superior ostendat, & ita affectum erga
aliquem, ut putet subditus nulla in re se posse
illi satisfacere. Octavum, si malam de subdi- *Mala de*
to opinionem præ se ferat, ut omnia in dete- *subdito opi-*
riorem partem interpretetur, quod revera *nio.*
summopere affligit. Nonum, si perfectionem *Si nulla*
Instituti & Regularum spectans Superior, nec *compassio.*
se ipsum considerans, nesciat compati infirmi- *Gal. 6.*
tatibus, sed defectus exaggeret, cum errata
deprehendit: in rebus vero injungendis non
tamquam rationalem & volentem filium, sed
tamquam inanime instrumentum movere vi-

24 *Industriæ ad curandos animæ morbos.*

*Æquivoca
Superioris
oblocutio.*

*Difficultas
indulgentiæ.*

*Rigida in-
terpretatio.*

*Remissa gu-
bernationis
capitula.*

*Minorum
neglectus.*

*Regularum
negligentia.*

*Nimia in-
dulgentia.*

Lib. 10.
Moral. c. 4.

deatur. Decimum, si ita loquatur aut jubeat aliquid, ut æquivoce atque obscure dicat, & quasi studio nolit intelligi, quo semper ei liberum sit subditum arguere: hoc enim mirum est, quantopere subditos pungat. Undecimum, si neget fere, quæ petuntur: est enim habenda ratio rei quæ petitur, ejus qui petit, ædificationis externorum & nostrorum, denique ejus qui petit utilitatis. Duodecimum & postremum, si quæ dubia sunt, semper scrupulosius & rigidius interpretetur.

3 Contra vero quæ debilem remissamque gubernationem faciunt, ad hæc reduci possunt. Primum, si tantum magna, & quæ scandalo sint, curentur; & ea demum sentiantur à Superiore, cetera vero passim negligantur. Secundum, si observatio Regularum, vel multitudinis earum prætextu, vel suavitate phrasibus Patris Nostri minus accurate urgeatur. Tertium, si quæ injunguntur facienda, ob exiguam subditi repugnantiam vel aliorum intercessionem, immutentur facile & prætermittantur. Quartum, si ex frequenti aliquorum transgressione, assuescat Superior quasi minus mala judicare, quæ mala esse perspexerit. Quintum, si judicat quidem & improbat, sed ne contristet, aut contra se crabrones excitet, non monet, aut corripit delinquentem. In quo sane illud D. Gregorii pertimescendum: *Cum mala corrigi loquendo possunt, silentium consensum esse pertimescat.* Sextum,

Sextum, si ad consolationem particularium, ne murmurent, vel ob auctoritatem aliquorum, vel ob suas amicitias, vel ob privatos respectus ea facile concedat, quæ vel illis vel communi ædificationi non satis convenient. Septimum, si ad evitandas amaritudines aliquas errantis cujusque vel alterius, nec investigat errata, nec corrigit, nec quæ necessaria sunt adhibet, præfertim ad cautelam. Octavum, si prætextu humilitatis & mansuetudinis permittat se negligi, & contemni quæ dicit. Nonum, si ex naturali timiditate, vel respectu aliquo ita perfuntorie & frigide monet, ut nihil delinquentem moveat, quasi admonitione illa id tantum voluerit, ut officio functus coram Deo videatur, seque ipsum liberet scrupulo prætermittæ correctionis. Decimum & postremum, si contentus monitis, cum ostenderit sibi errata displicere, putet se jam satisfecisse, nec rebus ipsis efficaciter medeatur, & quasi Heli arbitretur se omnia perfecisse, si dicat, *Non est bona fama quam ego audio, &c.*

1. Reg. 2.

24.

4 Ex his facile apparere potest, in quo sit asperitas, in quo item debilitas & relaxatio; quid in utroque extremo cavendum, ne duris nimis, aut plusquam oportet molles inveniamur. Nec difficile erit videre, quomodo efficacia cum suavitate conjungi debeat, ut & fortes in fine consequendo, & suaves in modo & ratione assequendi simus. In rebus enim vel

Vnde appareant asperitas & relaxatio.

*Quomodo ha-
dua conjun-
genda.*

concedendis vel negandis, in correctionibus & reprehensionibus adhibendis, in puniendis erratis, in rebus injungendis, in subditis ad virtutem & perfectionem promovendis, atque ad altiora provehendis, spectandæ sunt personæ, & vires corporis & animi; considerandæ opportunitates, exhortationes adhibendæ, charitas in primis cum zelo præferenda, longanimitas & patientia proroganda: nec tamen propterea permittendum, ut subditi ad impunitatem aspirent, ut ea faciant quæ volunt, quæ nolunt omittant, ut propriis inclinationibus satisfaciant, ut contra Superiorum jussa & judicia agere & sapere assuescant; ut Regulas consilia reputent, quæ si faciant, benefaciant; sin autem, nihil mali: hæc enim tolerare, non est suavitatis, sed languoris; neque hoc modo bono Societatis, imo ne ipsorum quidem, quibuscum ita agitur, ulla ratione consulitur. Non igitur Superiores arbitrentur se suaves in gubernatione esse cum ita agunt, sed remissos ac debiles. Nec sibi contra, cum asperi sunt, quasi de disciplinæ zelo blandiantur. Subditi vero studium & zelum perfectionis, religiosæque disciplinæ perpetuo promovendæ, rigoris & asperitatis nomine non appellent: nec talem exigant suavitatem, quæ noxia potius indulgentia sit: sed intelligant multa sibi neganda, si eorum perfectionem impendant; plurima contra vo-
tum

*Quid Superi-
rior.*

*Quid subdi-
ti.*

tum injungenda, si ad Dei gloriam, & commune bonum pertineant; correctiones & poenitentias ei, qui dirigi & emendari cupit, non esse averfandas; nec medicum censendum suavem, qui ex neglectu curationis permittit, ne infirmum offendant, morbos cum periculo crescere. Denique Superiorum indulgentiam arguere nos tepiditatis, Serenus (quem speculum nominis sui, Cassianus appellat in collatione de Mobilitate animæ) apposite admodum refert: cujus Patris verba, quia magnum revera horrorem hujus indulgentiæ, ac perniciosæ lenitatis ingerunt, adscribenda putavi. *In tantum enim, inquit, teporem videmus corruiſſe nonnullos, ut, neceſſe ſit etiam remiſſioribus monitis appaſpāri, modo ne deſertis cellulis ſuis, ad pernicioſiores inquietudines revolvantur; & circumeuntes ac vagi, craſſioribus (ut ita dixerim) vitiis implicentur: magnuſque fruſtus ab eis obtineri credatur, ſi ſolummodo ſe etiam cum qualibet ignavia valeant in ſolitudine continere, ac pro ingenti remedio ſoleat eis à ſenioribus dici: Sedete in cellulis veſtris, & quantum libitum fuerit, manducate & bibite, atque dormite, dummodo in eis jugiter perduretis.* Itaque invigilent in ea re Superiores, & præſertim Provinciales, ut contraria ſententia exterminetur, utpote Societati, & cuicumque religioſæ familiæ modis omnibus pernicioſa: non enim in eo ſuavitas poſita eſt, ut voluntati & deſideriis ſubditorum in omnibus

Coll. 7. c.
23.

Qua opinio
abolenda.

28 *Industriæ ad curandos animæ morbos.*

In quo suavisitas sit posita.

Prov. 30.

nibus obsequamur : sed sciant suavitatem in eo sitam esse , si , ut diximus , in obiurgationibus, v.g. nihil asperum, aut iracundum, aut perturbatum appareat ; sed paterna gravitas , pia quædam compassio & dulcedo quædam , sed vivida tamen & efficax eluceat : Si à puniente non tam voluntas humiliandi & castigandi , quam necessitas quædam ex zelo boni communis & utilitate ipsius etiam qui punitur , aliquid extorsisse videatur : Si negemus quod negandum est , quasi cum quodam doloris sensu, parati concedere quando & quod expedire videbitur: Si imperfectiones ita emendari velimus , non quasi nimium emungentes ne sanguinem eliciamus ; verum quasi exactores quidem , benigni tamen , qui non veluti vincendi studio , sed in bonum Societatis , atque adeo ipsius subditi , id velimus , ac si cum ipso in unum conspiremus ad victoriam de tentatore reportandam. Si jubentes circumspecte , & amanter, Dei gloriam, & subditorum lucra , non aliud quippiam nos quærere ostendamus: Si quod hodie non præstatur, patienter in crastinum expectemus , ita tamen ut semper expectatio finem spectet , & media applicet accurate: si quidem quod ex inopia spiritus à subdito obtinere non valemus , nulla ratione efficacius aut suavius consequi poterimus , quam si ille diligens sui scrutator & spiritualis evaserit. Si denique ita in visceribus charitatis cum

sub-

subditis agamus, ut & suas tentationes, in nostrum veluti matris sinum facile deponant, & vicissim correctiones nostras, sive quæcumque à nobis proficiuntur, tamquam ab amore profecta, repugnante licet sensu, animo tamen non exacerbato suscipiant. Quod & B.P.N. docuit, cum nona parte Constitut. severitatem cum benignitate & mansuetudine ita miscendam docet, ut nec se flecti Superior sinat ab eo, quod Deo ac Domino nostro gratius fore judicaverit; & tamen filiis, ut convenit, compati noverit, eo modo se gerendo, ut etiam qui reprehenduntur vel corriguntur, quamvis secundum inferiorem hominem quod agitur, displiceat; agnoscant nihilominus quod recte in Domino, & cum charitate ille suum officium faciat.

Cap. 2 s. 4.
Quomodo
miscenda
cum benignitate
severitas.

Ariditas & distractio in Oratione.

CAPUT III.

MULTA examinanda sunt, & diligentius investiganda, ut pro ratione morbi medicina possit applicari. Examinandum itaque primo, an sit continua, an interpolata. Si interpolata, an duret longo tempore, vel brevi. Si tantum in oratione matutina, an etiam in spiritualibus exercitiis die noctuque quasi

Ariditas
multipliciter
examinanda.

30 *Industriæ ad curandos animæ morbos.*

Causa ariditatis.

quasi perpetua sit: Videndum unde proveniat: perpendendum, distractiones unde nascantur, an ex quadam naturali instabilitate & volubilitate naturæ, quæ nesciat quasi quieta consistere; an ex desideriis & inordinato affectu erga aliquid, quod subinde recurrit & animum pulsatur, mentemque ad se importune revocat, an ex occasione aliqua temporaria tunc exorta; an ex defectu discursus, & inopia materiæ, ex qua cum non habeat mens quo sustentetur, in varia diffluit; an ex negligenti custodia sensuum, unde imagines oriuntur; an ex otiositate, levitate, scurrilitate, & huiusmodi, quæ animam ad exteriora revocant, & levem ac fere puerilem reddunt. An ex nimia occupatione, quæ spiritum quasi suffocat; an denique ex diuturna quadam probatione & subtractione internæ visitationis. Hæc enim omnia, & huiusmodi alia inquirenda sunt: nec enim omnium vel hominum vel morborum una curandi ratio esse potest. Et quidem de causis & remediis inquietæ atque impuræ orationis, multa tum apud D. Gregorium plurimis in locis, tum apud Cassianum collatione Abbatis Isaac de Oratione, spiritualis medicus invenire poterit: licet nonnulla sint, quæ pure contemplativis & Anachoretis magis convenient, cuiusmodi nostris proponere aut adhibere, prudentia & discretio non permittit.

Gregor.

Cassian.
collat. 9.

Quando provenit ex natura.

2 An autem ex naturali illa naturæ instabilitate-

stabilitate proveniat, inde colligi poterit, ^{sua instabi-}
 si sit continua, si à tempore Novitiatus, ^{litate.}
 per plures annos durauerit. Deinde si sine
 causa vel occasione ex parte infirmi. Si adhi-
 buit remedia, nec profecit. Si hæc remedia
 non inconstanter, aut ad tempus breve, sed
 perseveranti adhibuit diligentia. Quod si ^{Quomodo}
 sit ejusmodi, animandus erit ad tolerantiam, ^{animandus}
 ut magna longanimitate, & constanti studio
 virtutibus incumbat veris solidisque (ut ^{3.p.c.1.s.}
 Constitutio loquitur) & curet in via Divi ^{10.& 4.p.}
 ni servitii progressum facere : suppleat fre- ^{c. 4 s. 8. &}
 quentioribus & ferventioribus jaculatoriis, ^{10.p.s.2.}
 paupertatem suam spirituali quadam mendi-
 citate (de qua egregie Gerson) piissimo Pa- ^{Tomo 3.de}
 tri, & Deo, Sanctisque omnibus commen- ^{Mendicita-}
 dans. Lectione sacra non fusa, & longiore ^{te spiritua-}
 utatur, sed brevi, & meditatione atque at- ^{li.}
 tentione peruigili. Discurret per varia pun-
 cta Rosarii, vitæ & passionis Domini, gra-
 tias agendo, petendo, proponendo cum con-
 fusione imitationem, offerendo illa pro se
 æterno Patri: in qua Passionis meditatione
 si pie & perseveranter pulsaverit, inveniet
 proculdubio maximam lucem pro intellectu,
 & solidam stabilitatem pro affectu, cum ta-
 men à nobis non sint in nobis viæ nostræ aliud,
 quam tenebræ & lubricum. Si duret longo
 tempore, ut in quotidianis meditationibus &
 exercitationibus ariditatem & distractiones

^{Psal. 34.}
 Quid si lon-
 go tempore
 dures aridi-
 tas.

patiatur; hortandus est ad majorem secessionem, & spiritualia exercitia per aliquot hebdomadas: plurimum enim conducit ad quietem animæ comparandam, assiduitas illa meditandi & legendi, animumque mirifice revocat ab evagationibus, ut experientia sæpissime docuit. In his autem exercitiis illustrationes & proposita annotare, & aliquid excerptere, quo his absolutis utatur sive ad virtutum exercitia, sive ad mentis elevationem & conjunctionem cum Deo, plurimum proderit. Si tantum hoc in matutina oratione senserit, potest interdum fieri vel ex gravitate capitis, aut alia hujusmodi affectione, ut eo tempore minus aptus ad meditandum inveniatur; vel ex diuturna attentione, quam non valet per integram horam continuare: tunc dividenda erit, ut diversis temporibus fiat; vel commutanda ratio temporis (quod tamen considerate admodum, & non leviter concedatur) supplendum interdiu iteratis intentionibus & elevationibus: excitet se psalmorum versiculis, nunc ad compunctionem, nunc ad humilitatem, nunc ad petitiones, nunc ad laudes: denique efformet se ad varios affectus, prout major necessitas, aut sensus animi suggerit.

*Quid si in
matutina
oratione ac-
cideris.*

*Cum prove-
nit ex inor-
dinato affe-
ctu.*

3 Si provenit ex inordinato affectu & desiderio erga aliquid, hic laborandum fortiter & assidue, ut radix aut evellatur aut certe mortificetur & exsiccetur, ne germinet. Occasiones

casiones ex tempore ortæ facile vitari poterunt, non enim ex aliquo peculiari affectu aut inclinatione proficiuntur: itaque & facilius caventur, & non ita animum afficiunt, nec difficile abiguntur: tantum cautela non desit, & mediocris attentio, & custodia sui.

4 Si ex defectu discursus, & inopia materiæ, primo præparet puncta diligenter, legat meditationes de ea materia, (lectio enim mirum in modum juvat,) doceatur extendere puncta in vita & passione Domini, considerando, Quis, Quid, Pro quibus, Quanto amore, Quo fructu passus, attendendo personas, verba, opera, & cetera, reflectendo ad se, comparando, opponendo celsitudinem parvitati, pietatem ingratitude, & alia hujusmodi, quæ ingentem præbent meditandi, & discurrendi materiam. Denique semper habeat in promptu puncta aliqua abundantius, ut si in uno non potest, sistat in alio.

Cum ex inopia materia.

5 Si ex negligenti custodia, adhibeat diligentior, examinet se accuratius, caveat ab iis quæ lædere possunt: certum est enim illud Cassiani Collatione citata: *Quidquid ante orationis horam anima nostra conceperit, necesse est ut orantibus nobis per ingestionem recordationis occurrat. Quamobrem quales orantes volumus inveniri, tales nos ante orationis tempus præparare debemus.* Hæc ille.

Quid si ex negligentia.

Coll. 9. c. 3.

6 Si ex otio & scurrilitate, fugiat nugas, *Si ex otio & scurrilitate.*

elevet interdiu mentem, visitet sanctissimum Sacramentum; salutet Domini plagas, saltem semel orationem Dominicam recitando, vel imaginem B. Virginis cum Ave, vel Salve Regina; petat instantèr adhibitis intercessoribus, communicet omnia frequentius cum rerum spiritualium præfecto; meminerit quod Cassianus sapienter docuit: *Licet enim impossibile sit mentem non interpellari cogitationibus; est tamen, inquit, nostrum magna ex parte, ut cogitationum qualitas emendetur, & vel sanctæ & spirituales in cordibus nostris, vel terrenæ carnalesque concrecant. Ideo namque frequens & jugis adhibetur lectio Scripturarum, ut exinde nobis spiritualis memoriæ præbeatur occasio.* Denique monendus accurate, ut serio fugiat ab inani quadam persuasione, & noxio loquendi modo eorum, qui cum nullam vel exiguam in custodia sensuum curam adhibeant, libereque & laxè nimis in omnibus agant, in spiritualium procuratione tepidi sint & segniores; suam tamen spiritus ariditatem, & distractiones in oratione, & quasi quamdam insensibilitatem in interioribus, adscribunt divinæ probationi, quæ illos, ut quidam loquuntur, à lacte abstractos, ad panem & solidum cibum erudiat, quasi grandiores. Ceterum recogitet potius, quid S. Gregorius contra ejusmodi homines dicat: *Nam per contemplationem rimari cælestia volumus, qui non solum cordis, sed etiâ corporis custodiam non habemus. Et quidem sæpe indecenter*

Coll. I. c.
17.

Quid maxime fugiendum.

In I. Reg.
c. i. in illa
verba, &
ascendebat
vir, ne statueret
in diebus.

decenter aspicimus, otiosa audimus, superflua loquimur, somnum, cibum, non ad refectiorem corporis habemus, sed ad usum delectationis. Itaque cum discutere ambigua volumus, superna conspicerem, tenebras nostras deserere, internæ dulcedinis saporem gustare, ab illius secreto tanto dignius repellimur, quanto munitionis nostræ fortitudines negligentius dissipamus: jamque nobis tanto est ascendere difficilius, quanto ad nosmet ipsos relapsi, in altitudinem custodiæ erigere non curavimus cordis munitiones. Diligenter igitur examen adhibendum est, & venialia etiam, atque minuta cavenda, nam & illa non leviter impediunt. Quocirca idem Sanctus egregie monet: *Quia sine peccato, inquit, electi etiam viri esse non possunt, quid restat nisi ut à peccatis, quibus eos humana fragilitas maculare non desinit, evacuari quotidie conentur? nam qui quotidie non exhaurit quod delinquit, et si minima sunt peccata quæ congerit, paulatim anima repletur, atque ei merito auferunt fructum internæ saturitatis.*

7 Si ex nimis occupationibus, studiose caveat non necessarias, nec proximis utiles. Subtrahat aliquid voluntariis relaxationibus, suffuretur è mediis occupationibus aliquid temporis vel brevissimi, ad mentem elevandam in Deum, se circumspiciendum; curet habere mentem liberam, & juxta S. Bernardi consilium, non se tradat negotiis, sed accommodet: petat à Superiore moderationem aliquam in actione, & ad breve tempus omnimodam

Examen adhibendum.

S. Greg. I.

2 c. 2. in 1.

Reg. in illa

verba, fame-

lies saturati

sunt.

211. 1

1

Quid cum ex nimis occupationibus.

etiam cessationem, redibit enim postea alacrior
& utilior.

*Si ex sub-
tractione di-
vina.*

*Serm. 54. in
Cant.*

*S. Bern. ibi-
dem.
Psal. 118.
142.*

*Proc. 7.
§. 21.*

*Quinque
causa sub-
tracta devo-
tionis ex
S. Bonaven-
tura.*

8 Postremo, si ex divina dispensatione & subtractione, tunc animandus ad patientiam, & suaviter fovendus, ne animo dejiciatur: sed curet primum seipsum coram Deo humiliare, sibi hujus subtractionis causam adscribere, non placere sibi, sed accusare semetipsum, quoties in se vel ad modicum tepere gratiam senscrit. *In veritate enim didici, S. Bernardus inquit, nihil æque efficax esse ad gratiam promerendam, retinendam, recuperandam, quam si omni tempore coram Deo inveniaris non alium sapere, sed timere.* Hujus autem subtractionis effectus & signa ponit idem Sanctus: *Exaruit, inquit, cor meum, coagulatum est sicut lac, factum est sicut terra sine aqua; nec compungi ad lacrymas queo, tanta est duritia cordis: non sapit psalmus, non legere libet, non orare delectat, meditationes solitas non invenio. Vbi illa inebriatio spiritus, ubi mentis serenitas, & pax & gaudium in Spiritu sancto?* Causam autem hic Pater refert ad superbiam, sive quæ fuit, sive quæ futura esset, nisi ita humiliaremur. At S. Bonaventura de Processu Religionis, quinque adfert hujus sterilitatis & subtractæ devotionis causas. Prima est, inquit, humiliationis: Secunda, purgationis, quia minus purgatus fuit, minus studiosus in devotione quaerenda, vel minus gratus in accepta. Ter-
tia,

tia, eruditionis, ut intelligat, id non à se, suisque meritis, sed à Dei gratia & liberalitate pendere. Quarta, ex indiscreto impetu & conatu cordis, quo quasi libertas mentis obruitur, & devotio veluti per violentam extorsionem exprimendo quæritur. Quinta ratio, meritum majoris gratiæ, & gloriæ, dum desiderium non impletum affligendo purgat animam, & patientia desolationis, & humilis sufferentia mœroris, quasi lima reddit animam clariorem, & magis susceptibilem divini splendoris. Hæc ille. Sed Gerson Cancellarius copiosius, quamvis brevissime, decem & septem ponit hujus subtractionis causas. Prima est, quam posuimus ex Beato Bernardo, quem citat, id est, ad superbiam retundendam vel cavendam. Secunda, ad desiderium vehementius inflammandum. Tertia, ad cognitionem propriæ fragilitatis, ut homo sibi vilescat. Quarta, ut induat viscera pietatis super aliorum desolatione. Quinta, ad satisfactionem per dolorem illum sensibilem, quem patitur. Sexta, ut qui possunt alios juvare, non ita se dedant internis consolationibus, ut à charitatis negotiis, & aliis juvandis retrahantur. Septima, ut experientia per hanc tentationem edoctus, virtutes ceteras & melius discat & efficaciter doceat. Octava, ne deserat homo, pro hac dulcedine, Dei jussa. Nona, ad punitionem venialium,

De Myst.
Theolog.
pract. Con-
sid. vel in-
dustria 6.
Decem &
septem ex
Gersono.

Rom. 9.

Deut. 32

*Quid in hac
subtractione
nobis pra-
standum.*

tamquam si pater tristiores filio faciem ostendat, ut in omni custodia & modestia reddatur diligentior. Decima, ut intelligat homo non haberi hoc per propriam industriam, neque volentis, aut currentis esse, sed miserentis Dei. Undecima, ad purgationem maris spiritualis, quod ex nimia quiete sordes contrahere solet, quas exagitatio commotioque depellit. Duodecima, ut innotescat, si gratis anima timeat Deum, si parata est absque stipendio consolationum & suavitatum suo Imperatori deservire. Decimatertia, ne incipiat dona Dei pro ipso diligere, iis adhærens, iisque se oblectans, cum tamen pater indulgentissimus hæc dispensatorie subtrahat, ut pomum, aut cibum, parans interim hereditatem & regnum. Decimaquarta, interdum ad conservationem corporis & virium, ne in lacrymis, gemitibus, & dulcedine sensibili tabescat & deficiat. Decimaquinta, ut provocet Deus sicut aquila pullos ad volandum, ut mater filium ad horam relinquit, quo instantius ille clamet, accuratius quærat, arctius stringat, & illa vicissim blandiatur suavius. Decimasexta, ad exercendam patientiam, quia sic affici, non est sine magna tribulatione & anxietate. Decimasextima & postrema, ut vel hinc conjiciat anima, quantæ futura esset amaritudinis perpetua separatio, si tantilla subtractio sic afficit. Ceterum in hac subtractione, qua Dominus privatione consolationis

lationis, ut ait Sanctus Diadochus, intemperantiam nostræ voluntatis castigat, ut nos virtutis & vitii differentiam doceat; illud semper tenendum est, ut idem ait, ut cum dolore, humilitate, ac decenti subjectione speremus semper de divina pietate; hoc enim habere solet recessio gratiæ ad erudiendum.

9 Sed in his omnibus illud curandum diligenter, quod Theodorus apud Cassianum ponit, ut simus ambidextri, id est, ut prosperis & adversis spiritualibus successibus ad anteriora semper progrediamur, ut sive ferventes spiritu, & à terrenis sublimati, ac spiritualibus meditationibus pasti; sive cum omni spirituali fervore subtracto, quodam tepore atque mœnore tepescimus, cum intolerabili quodam tetraque fastidio universa sordent instrumenta virtutum, utraque quasi manu ad victoriam utamur. Vnde subdit: Quisquis igitur in illis, quæ dextræ partis esse prædiximus, minime fuerit subintrante gloria vanitatis elatus; & in istis, quæ sinistræ partis sunt, viriliter dimicans, nulla desperatione conciderit; ac potius de contrariis arma quædam patientiæ ad exercitium virtutis assumpserit: utraque manu utetur pro dextra, & in utroque actu triumphator effectus, tam de sinistro statu, quam de dextro palmam victoriæ consequetur.

*Curandum
in primis ut
simus ambidextri.
Coll. 6.
c. 10.*

*Languor & debilitas in spiritu,
& virtutibus.*

CAPVT IV.

*Remedia
hujus morbi
excitantia.*

HOc morbo laboranti, quasi somno gravi oppresso, remedia excitantia applicanda.

*Eccl. 9. v. 1.**Serm. 23. in
Cant.*

I Primo enim illud insonandum est, quod certe vel profunde dormientem excitat: *Nescit homo utrum amore, an odio dignus sit.* Terribilis est, inquit B. Bernardus, locus iste, & totius expers quietis. Totus inhorruui, si quando in eum raptus sum, illam apud me replicans cum tremore sententiam: Quis scit, si est dignus amore, an odio? Et cum hæc cogitatio vel sanctissimos viros, & quasi columnas in Ecclesia compulerit ad tremorem, quid nobis faciendum, qui ex multis responsum mortis in nobis habemus, si non aliquantulum ex quibusdam conjecturis & indiciis nostræ salutis recreemur? An quia Religionem ingressi sumus, omnia tuta arbitramur? fallitur nimis ista persuasio, & periculose decipitur. Certe D. Gregorius aliquos asserit veluti duces currentes, aliis viam perfectionis ostendere, qui tamen in foveam cadentes, suo malo sequentes cautiore reddant & humiliores. Non ergo lan-
guide

guide & tepide agendum, sed ardentem & strenuam.

2 Ostendendum illi, qualem oporteat esse animam religiosam. *Quanta*, inquit D. Bernardus, *in affectionibus ordinatio, quanta in moribus disciplina, quanta in orationibus armatura, quantum in actionibus robur, quantus in zelo terror, quanta denique ipsi cum hoste congressuum assiduitas, numerositas triumphorum?* Hæc attendens, seque melioribus parans, seipsum arguat, & quasi sæcularis adhuc conversationis hominem damnet.

Qualem esse oporteat religiosam animam.

Serm. 39. in Cant.

3 Ostendenda illi miseria status hujus, quomodo quasi hæctica febris laboret, qua cum quotidie magis tabescat & conficiatur, quo plus ea laborabit, minus illam sentiet.

Miseria huius status.

4 Indicanda pericula; facile enim consentiet tentationibus, si concutiat, ut qui non sit fixus in Deo, sed quasi pendulus, & in actibus vix faciet aliquid præclarum vel sua vocatione dignum: & tandem exponitur periculo deferendæ vocationis. *Quam multos enim*, inquit S. Bernardus, *videmus, & plangimus, Fratres, qui dummodo maneat habitus & tonsura, salva sibi omnia arbitrantur: non considerantes miseri quemadmodum ingratitude vermis interiora corrodens, ob hoc tantum corticem, quem vident, transforare dissimulet, ne forte recogitent, & erubescant, ipsaque verecundia emendentur.*

Pericula indicanda.

Serm. contra pessimum vitium ingratitudinis.

Qui sic interdum in nonnullis consumpta esse interiora universa præsumit, ut non vereatur ad ea, quæ

Osee 7.

S. Bern. ser.
63. in Cant.
Languor fri-
gus anima.

foris apparent, venenatum ducere caput: nisi forte quos videmus manifeste apostatare à Deo, repente fieri pessimos arbitramur, & non magis paulatim defecisse, cum comederint alieni robur eorum, & nescierunt. Sed egregie idem rem omnem quasi oculis subjicit his verbis: *Hoc frigus si semel animum, animæ quidem (ut assolet) incuria, spiritus dormitante, pervaserit, ac nemine deinde (quod absit) inhibente, ad interiora ejus pervenerit, descenderit in viscera cordis, & sinum mentis, concusserit affectiones, occupaverit consilii semitas, perturbaverit judicii lumen, libertatem adduxerit spiritus; mox (ut in corpore solet evenire febricitantibus) subit quidam animi rigor, & vigor lentescit, languor fingitur virium, horror austeritatis intenditur, timor sollicitat paupertatis, contrahitur animus, subtrahitur gratia, protrahitur longitudo vitæ, sopitur ratio, spiritus extinguitur, defervescebat novitius fervor, ingravescebat tepor fastidiosus, refrigescit fraterna charitas, blanditur voluptas, fallit securitas, revocat consuetudo. Quid plura? dissimulatur lex, abdicatur jus, fas proscribitur, derelinquitur timor Domini. Dantur postremo impudentiæ manus, præsumitur ille temerarius, ille pudendus, ille turpissimus, plenus ille ignominia & confusione saltus de excelsis in abyssum, de pavimento in sterquilinum, de solio in cloacam, de cælo in cœnum, de claustro in sæculum, de paradiso in infernum. Hactenus ille.*

In tepiditate
sunt multa
vitia.

5 Intelligat, sicut in naturalibus, in formis remissis plurimum esse admixtum contrarii, nec

nec repugnare aliquid esse calidum, quod multum habeat frigiditatis; ita in hac tepiditate, & languore plurima esse admixta vitia, plurimas imperfectiones etiam in iis ipsis virtutibus, quas habere videmur: v.g. blandimur nobis de obedientia, quod in plurimis obediamus, atque affectum quemdam erga virtutem hanc nobis habere videamur: tamen si obedientia remissa sit & languida, plurimos actus eliciamus inobedientiæ, innumeras imperfectiones ex defectu circumstantiarum, & diligentiae ac fervoris in iis ipsis actibus, in quibus nobis de obedientia blandimur. Idem de castitate, patientia, zelo animarum, ac ceteris. Atque ita sicut habemus in altero, unde Deum laudemus, atque confortemur; ita non deest in altero, unde gemamus. Et hoc sane diligentissime perpendendum, quo quasi stimulo ad perfectionem excitemur.

6 Examinet, an languor hic & debilitas, *Examen huius languoris.* sicut in corporalibus contingit, proveniat ex redundantia malorum humorum: ut si habet fines particulares, & seipsum quærit; evacuandi humores, alioqui frustra nititur. Si ex defectu alimenti, videat quo modo frequentet Sacramenta, meditationes, orationes, & spiritualia: perpendat quomodo non nutriatur, examinet diligenter, & cognoscere satagat. Nam iis non refici, impinguari, & roborari, satis per se malum est; & aliquid indicat subesse, quod

44 *Industria ad curandos animæ morbos.*

quod accurate investigandum, & diligenter sit emendandum.

*Frequens
communio.*

7 Dispensetur, ut frequentius confiteatur, & communice; ita tamen, ut ad præparationem aliquid ei peculiare iniungatur, ne si id etiam ex consuetudine faciat, augeatur potius morbus, ut solet, quam minuatur.

Plus oret.

8 Assignetur illi plus temporis, saltem horæ quadrans, orationi, vel piæ alicui & utili lectioni; ad quam accedat non segniter, sed studiose quasi ad medicinam, quam ex desiderio sanitatis, cum desiderio suscipiat. Nec verendum, ne breve illud spatium litterarum studiis aut aliis exercitationibus aliquid detrahat: sed cogitandum potius cetera omnia languescere, nisi spiritus roboretur.

*Legat vitas
Sanctorum.*

9 Legat Sanctorum vitas sibi aptas; plurimumque proderunt ad id domesticæ, ut B. P. N. IGNATII, Xaverii, & aliorum. Legat autem non percurrendo, sed ad spiritus exercitationem.

*Per exerci-
tia & per
confessionem
generalem se
renovet.*

10 Si renovatio votorum adhuc longius absit, valde conducet, si præmissis exercitiis spiritualibus per aliquot dies, & diligenti confessione vel ab ingressu in Societatem, vel ab eo tempore quo sic ægrotare cœpit, renovet ipse secreto sua vota, cum desiderio quasi de novo incipiendi, illud apud se constanter statuens & subinde repetens: *Et nunc quæ est expectatio mea, nonne Dominus? & substantia mea apud*

Psal. 38.

te est. Et illud: Dixi: Nunc capsi: hæc mutatio dexte- Psal. 76.
ræ Excelsi.

11 Accipiat unam aut alteram virtutem *Exercitatio in aliquibus virtutibus.*
congruam, in quarum actibus sese studiose
exerceat: & si nulla eo die detur occasio, saltem
in examine petat virtutes illas à Deo, & sese
paratum cum desiderio offerat.

12 Mortificet se, negando sibi nonnulla, *Adhibenda mortificatio, etiam in levibus.*
etiamsi levia, ut excitet spiritum contra car-
nem; & proprias voluntates ac desideria, vel
in iis refecare consuescat.

13 Conveniat cum Superiore, eumque ob- *Roget Superiorem ut se mortificet.*
secret, ut etiam nolentem & querulum morti-
ficet, urgeat, & extimulet: cum eodemque fre-
quenter communicet, & speret de Domini
bonitate.

14 Demum habeat semper præ oculis, quod *Cassiani documentum præ oculis habeat. Coll. 7. c. 6. Proverb. 14. Ibid. 16.*
apud Cassianum Serenus egregie docuit: cum
enim attulisset à Scripturis juxta septuaginta
Interpretes, *In omni sollicito inest amplius; at qui*
suavis & sine dolore est, in egestate erit: Et iterum,
Vir in laboribus laborat sibi, & vim facit perditioni
sue: nec non etiam, *Regnum celorum vim patitur,*
& violenti rapiunt illud, subdit: Nulla namq; virtus
sine labore perficitur; nec ulli possibile est, ad istam
quam cupitis, stabilitatem mentis sine ingenti cordis
contritione conscendere: Homo enim ad laborem nas- *Iob 7.*
citur.

Defectus obedientiæ.

CAPUT V.

*Pulchritudo
obedientiæ &
necessitas.*

*In epistola
de Obe-
dientia.*

*Legat accu-
rate Episto-
lam B.P.N.*

*Meditatio
de hac vir-
tute.*

*Exempla
Sanctorum
sibi colligat.*

OSTENDENDA illi obedientiæ pulchritudo, necessitas, animi tranquillitas, meritum, professio in Societate, quam peculiarem suorum notam B. P. N. esse voluit: denique hoc esse præ ceteris votis, ut Sancti & Doctores tradunt, quod vere faciat Religiosum.

2 Vt diligenter & serio legat per aliquot dies ejus epistolam de Obedientia: ibi tamquam in speculo suas maculas intueatur: ibi quantum à vera obedientia absit, inspiciat, & defleat, confundatur, & erubescat, & excitetur ad meliora.

3 Vt meditationes aliquot appositas de ea re per plures dies habeat, ut in copiosa admodum materia, de qua plurima meditari licet, quæ à Præfecto rerum spiritualium suggerenda, & à Scripturis, atque à Sanctis Patribus petenda erunt: & quæ breviter primo puncto attingimus, magna cum humilitate dilatari possunt; præsertim si addantur aliqua puncta de iis, quæ juvare, aut retardare possunt.

4 Vt colligat sibi aliqua exempla Sanctorum in hac virtute, quæ ad manum habeat, qui-

quibus se subinde obiurget & reprehendat.

5 Vt examinet diligenter, & cum Superiore & Præfecto Spirituali conferat, in quo rerum genere majorem sentiat animi repugnantiam; & ea unde oriatur, an ex superbia, vanitate, pigritia, affectu inordinato ad studia, vel quævis alia, proprio aliquo fine & desiderio: ut ibi medicinam admoveat.

*Examine
causas repugnantiæ.*

6 Vt constanter applicet animum, Deum in Superiore cognoscat, nec humanis rationibus & discursibus det locum: quod malum cum sensim in animum irreat, mirum est, quomodo omnem obedientiæ simplicitatem, alacritatem, promptitudinem, denique perfectionem omnem exhauriat. Vnde vigilanter advertat, ut quoties tale aliquid suggeritur animo, veluti venenum quam citissime expellat.

*Deum in
Superiore
agnoscat.*

7 Incessanter à Domino hanc virtutem petat, & in examine tam communi quam particulari præcipuam ejus rei curam gerat.

*Examine &
oratione à
Deo petat.*

8 Proderit si Superior aliquando jubeat, ut se per biduum aut triduum paret ad aliquid incertum faciendum, quod forte contra ejus voluntatem & sensum erit, ita tamen, ut animo statuatur numquam positive se in contrarium consensurum.

*Animi preparatio
ad quodvis faciendum.*

9 Numquam aliquid proponat, quin duo illa præmittat, à B. P. N. præscripta, Orationem, & Resignationem: quod si hanc non sen-

*In proponendo prævia
sint oratio &
resignatio.*

Const. 3. p. sentiat, saltem desideret & petat à Domino, c. 2. §. 1. statuaturque se etiam renitentem facturum: paulatim enim (ut ait S. Macarius Ægyptius) dulcescet ipsa virtus, ad quam veluti reluctantem nunc se adigit.

*Quomodo
in levioribus
assuescat.*

10 Injungat ei Superior frequenter leviora, & in quibus novit eum non habere difficultatem, ut sic assuescat ad alterius jussum aliquid facere: post factum collaudet, addat animum, &c.

*Exercendus
per biduum
in difficultibus.*

11 Aliquando sumat aliquod certum, in quo magnam ille habeat difficultatem, dicaturque ut ad id faciendum per biduum aut triduum se præparet, ut ex communi consensu id faciat. Vbi fecerit, si alacriter tulerit, recreet & animet, docens eo exemplo fore, ut omnia sint faciliora; si gravate, laudet patientiam, promittat victoriam, fore ut facilius vincat, atque paulatim hac exercitatione robustior evadat.

*Interdum
pie condescendendum.*

12 Aliquando pie condescendat Superior, ut id prætermittat, ad quod gravem sentit repugnantiam; sed ita paterne, ut intelligat ille, fuisse piam dispensationem, & suavem condescensionem, tantum ut proficiat & crescat, & ut robustior factus possit alacriter portare, quod modo non potest. Interim tamen licet Superior ex parte sua id faciat, sciat tamen se sibi meritum & vires imminuisse, quas auxisset, si se magno animo vicisset.

13 Moneat eum Superior per Præfectum spirituales, & alios probatos viros, si quos ille habeat familiares, & quibus ipse confidit.

Monendus per familiares.

14 Quod si desit voluntas curationis in infirmo, ut medicamenta respuat, tunc primo acrius erit extimulandus, & causticis, ut ajunt, utendum, ut intelligat se malo in statu & valde periculoso versari; nec posse propinquare sanitati, qui à remediis abhorreat. Secundo orandum pro eo diligenter à tota Domo, tamquam pro eo, qui periculose admodum laborat. Tertio, monendus Provincialis. Sed sperandum est, si suscipiatur curatio modo prædicto, paucos futuros adeo rebelles.

Quid si desit voluntas in infirmo.

Effusio ad exteriora.

C A P V T V I.

CONSIDERANDVM, an id proveniat ex quadam inquieta & mobili natura: tunc enim licet ea reprimenda sit & dirigenda, tamen revera vix assurgat, ut fiat homo interior atque collectus, nisi singulari gratia præveniat, & ipse studiose & valide naturam domet; & actibus frequenter, validisque se comprimat. Hic autem occupandus erit ex obedientia in negotiis utilibus & piis; coërcendus ne in alia dilabatur & diffuat: prudentis enim est,

Causa ex quibus proveniat.

Occupandus in utilibus negotiis.

D

apte

apte uti ingeniis hominum ad bonum. Monendus ut interrumpat aliquando perpetuitatem actionis, & si nihil aliud, quiescat saltem in cubiculo, legens aliquid spirituale, vel recitans Psalmos aut Rosarium, vel examinans conscientiam, ita ut omnino abstineat ab exterioribus. Monendus, ut subinde dirigat intentionem, examinet defectus, qui frequenter in talibus subrepere solent, loquacitatis, curiositatis, impatientiæ, nugatoriarum narrationum, adulationis, vanitatis, murmurationum, judiciorum, & hujusmodi. Ex his cautior fiat, & humilior, misereatur sui ipsius, & apud se vilescat, qui quasi doctus diligere trituras, vel ad altiora non assurgit, vel mox recidit. Studeat ex hac confusione in obedientia esse promptior, in injuriis tolerantior, in officiis abjectioribus devotior, in aliorum infirmitatibus magis compatiens, in mortificationibus carnis ferventior: denique compenset aliis officiis & exercitiis, quod in hoc minus habet. Si vero nascatur potius ex quadam interiori ariditate, qui cum spiritualia & interna non gustet, quærit in exterioribus solatia, alia via incedendum est.

*De quibus
monendus.*

Osee 10.

Quid si nascatur ex interiori ariditate.

*Restringendæ
vagationses.*

I Restringendæ occasiones vagationis, multa negotia, etiam utilia, aliis demandando.

A visitationibus abstinendum.

2 A visitationibus non per unam aut alteram hebdomadam, sed per aliquot menses omni-

CAP. VI. De effusione ad exteriora. 51

omnino absteineat, ut assuescat vel invitus domi sese continere.

3 Omnino servet Regulam, ne accedat ad colloquia externorum, nisi jussu Superioris à janitore vocatus. *Regula de non alloquendo externos.*

4 His, jam contrariis remotis, incipiat frequentius ad cor redire, examen conscientiae brevissime, sed frequenter faciat, se ad se intus revocans, mentem ad Deum elevans, & vel unico suspirio dicat cum confusione: Vide Domine humilitatem meam, & laborem meum. *Sese frequentius colligat.* *Psalm. 14.*

5 Præfigat sibi certum tempus ad piam lectionem, saltem bis in die, qua vires reparat. *Lectio pia.*

6 Vnam aut alteram decadem Rosarii divisam, per totum diem recitet, petendo, proponendo, & compungendo, desiderando, gratias agendo, &c. Bonum aliquem spirituales affectum, si non ubertim sponte fluentem, saltem humilitate & assidua quasi retractatione exprimat. *Rosarii rectitio.*

7 Habeat ad manum expedite versiculos aliquotè Scripturis, qui compunctionem excitent, quos sibi colligat, vel ab alio collectos memoriter discat: v. g. *Super custodiam meam stabo, & figam gradum supermunitionem, & contemplanor, ut videam quid dicatur mihi, & quid respondeam ad arguentem me.* Item: *Sicut aqua effusus sum.* & illud: *Fili mi ne effluas.* & illud: *Spiritus sanctus disciplinae effugiet fictum, & auferet* *Versiculi prompti ad excitandum affectum.* *Hab. 2. 1.* *Psalm. 21. 15.* *Proverb. 3.* *21. juxta LXX.*

52 *Industria ad curandos animæ morbos.*

se à cogitationibus, quæ sunt sine intellectu. & illud:
 Eccl. 38. 25. *Qui minoratur actû sapientiam percipiet: & innumera hujusmodi, quæ cum aliquo desiderio subinde jaculetur.*

Exercitia. 8 Exercitia spiritualia, etiamsi ægre contineri possit, per plures dies faciat.

Collectio ante negotia. 9 Antequam negotia aggrediatur, colligat sese, dicatque cum S. Bernardo: *Vbicumque fueris, tuus esto: noli te tradere, sed accommodare.* Vbi vero perfecerit, redeat ad se statim, & negotia, quoad poterit, aliquantula quiete interrompat: nam vel tantillum sedere in via, vires fesso reparat: nec est omnium inter strepitus viarum, & negotiorum Deo sibi que esse præsentem.

Impetus reprimendus. 10 Vbi impetus ad aliquid agendum impellit, hoc ipso aliqua morula se detineat, ut assuescat non sequi statim animi impulsus.

Vim sibi inferat. 11 Postremo intelligat, nisi vim sibi inferat, seque quibusdam quasi catenis vinciat, etiamsi natura & consuetudo reluctetur, omnino nihil promoturum: sed si id faciet, paulatim dulcescet illi Deus, & spiritualium atque interiorum tractatio reddetur quotidie facilior. Morbus enim acediæ & evagationis nulla alia re magis exaggeratur, ut Cassianus & experientia docet, quam si cedamus.

Amor excellentia & honoris.

CAPVT VII.

I NTELLIGAT infirmus ante omnia, Morbi leuiores signa grauioris.
 sicut in morbis corporalibus contingit, ut
 levissimum sit aliquando symptoma, si per se
 spectetur, quod tamen valde timendum est, si
 advertatur unde proveniat; ita erumpentia
 quædam signa vanitatis, amoris excellentiæ, &
 huiusmodi, quæ interdum à nobis parvi fiunt,
 indicare non leuem superbiæ morbum. Ea au-
 tem cum duplex ponatur à Sanctis, præcipue
 vero à Cassiano lib. 12. de Institut. hæc, de qua Cassian.
 nunc agimus, valde carnalis est & crassa.

2 Animadvertat, amarissimos inde oriri Quales fructus superbia.
 fructus, eosque frequentes, quibus miseram
 animam cibari sæpius in die contingit: in rebus
 enim obedientiæ, ubi aliquid non est specio-
 sum, magnam inveniet difficultatem in illatis
 molestiis: & si quid contingat (quod frequen-
 ter accidit) in quo non videatur magni fieri,
 impatientia & tristitia maxima obruetur: in
 ministeriis, nisi ab omnibus collaudetur, ani-
 mum despondebit. Contra efferetur, ceteros
 despiciet, & fiet intolerabilis, si pro voto lau-
 detur: opera quæ faciet, sæpissime intentionis
 impuritas maculabit: multa prætermittet ex

54 *Industriæ ad curandos animæ morbos.*

timore bona, quæ alioqui faceret : directionem, & exhortationem non admittet : unionem fraternam sæpissime lædet : in culpæ cognitionem numquam consentiet : at ubi est defensio peccatorum, quid boni sperandum? Legat diligenter Cassianum dicto libro 12. cap. 29. de signis superbiæ; imo accurate, & cum meditatione non semel totum librum duodecimum, & præcedentem, qui est de cenodoxia; & inveniet tam causas morbi, quam remedia egregie descripta.

*Remedia:
per medita-
tionem.*

3 Meditationes de humilitate, ejus pulchritudine, utilitate, necessitate : item de superbiæ fœditate, iniquitate, damnis, &c. non perfunctorie, sed adhibita diligenti exercitatione per aliquot dies aggrediatur : certoque apud se statuat, non esse hujus morbi curam levem aut facilem. Petat itaque à Domino assiduus tum suis, tum aliorum precibus sanitatem.

Per examen.

4 Vbi viderit per examen fructus malos pestiferæ hujus radicis, recurrat statim ad eam, ibique se reprehendat, ibi gemat, nec umquam alteri causæ, præsertim aliorum culpæ, defectum tribuat.

*In quibus se
exerceat.*

5 Contrariis operibus constanter insistat : In humilioribus exerceatur, non modo officiis domesticis culinæ, &c. quæ juvant quidem, & ad impetrationem conferunt; sed multo maxime in iis functionibus, ad quas minus affici-

*Exam. c. 4.
§. 28.*

afficitur, & quæ ab aliis minus suspiciuntur, & si detur optio, eligat semper humiliora.

6 Proponat Superiori ea media suscipienda, à quibus sensus magis abhorret: & sciat, si curari serio velit, sibi contra se cum Superiore conspirandum, ut & ipse sibi vim inferat, & Superior variis mortificationibus & humiliationibus, quasi conjunctis copiis, eum juvet.

Remedia à sensu magis abhorrentia sequatur. Ibidem.

7 Capitula, seu publicas reprehensiones, non ad externam tantum speciem, & ut dici solet, pro forma; sed ad humiliandum, & vere confundendum apposita petat. Dentur aliquando non petenti, imo nec cogitanti (de quo tamen, antequam fiat, cum illo statuisse oportet) ut cum majore præparatione & fructu suscipiat.

Publica reprehensiones in hac re utiles.

8 Si quis est domi, cum quo peculiaris aliqua ratio æmulationis subsit, hunc præcipue colat; sed ab eo contra juxta præscriptum Superioris, quasi ex composito, in specie exteriori contemnatur.

Æmulos præcipue colat.

9 Numquam sua narret, etiam prætextu ædificationis: quod enim sanis cibis esse potest, infirmo nocet: nec est infirmorum, ut in hujusmodi narrationibus Dei gloriam, non suam quærant.

Reticere sua.

10 In hoc præcipuo hoste debellando illud tenendum est, ut sine intermissione eum persequatur, semperque faciat contrarios aliquot actus, dicens cum Scriptura: *Perdam Babylonis*

Quid in hac re tenendum.

Isa. 14 22.

56 *Industriæ ad curandos animæ morbos.*

lonis nomen, & reliquias, & germen, & progeniem.

Psal. 17. 38. & item: Persequar inimicos meos, & comprehen-
dam illos: & non convertar, donec deficiant.

Viriliter de-
cernendum.

Postremo intelligat, nisi viriliter decertet, non modo futurum se quotidie erga hostem hunc debiliorem, sed etiam paulatim morbum ipsum minus cogniturum, ita ut cum fiat affidue magis superbus, & gloriæ cupidus, videatur sibi semper humilior & sanctior: hæc enim est morbi hujusmodi natura, hic lethargus.

*Inclinatio ad sensualitates &
amicitias.*

C A P V T V I I I.

Natura hu-
jus morbi.

MO R B V S hic crassior, & magis carnalis est; nec adeo difficilis curationis, modo mediocri aliqua cautela sese curet ægrotus.

Religioso
non ne in-
dignus.

1 Itaque intelligat, hanc Religioso homine, qui crucifixus esse debet, valde indignam esse, & vilem, ac turpem agendi rationem, ut sic confundatur, & reputet se omnibus viliorem.

Secularia
vicia.

2 Numquam admittat, multo minus quærat, in victu, vestitu, vel recreationibus aliquid singulare: & si ab externis offeratur, rejiciat; vel si justis ex causis recusari non possit, ad Superiorem pro infirmis referat.

3 Extra tempora prandii, & coenæ, etiam si maxime se affici sentiat, nihil sumat : nam servare aliquid apud se, etiam Superiore consentiente, sumendum pro libito, probandum non est ; nec etiam ædificat, dispensatorem aut aliquem alium fratrem ea de causa interpellare.

Temperantia illi per necessaria.

4 De iis quæ domi dantur, pane, vino, carnibus, memor paupertatis & mortificationis, numquam conqueratur, sed curet semper optare viliora : & si quando tale aliquid subreperit, agat potius Deo gratias pro qualicumque sanctæ paupertatis experimento.

Querelas vitet.

5 Ne carnem nutriens contra se imprudens exacuat, memor sit, ad interiores meditationes & virtutis actus addere etiam corporales afflictiones, disciplinas, & alias pœnitentias : petat eas, & statas habeat ; nec imprudenter sibi blandiens putet, quod magna certamina non sentiat, se huiusmodi rerum usu & exercitatione non egere.

Corporalis afflictio addenda.

6 Silentium diligentissime servare studeat : vix enim credi potest, quantum hæc disciplina silentii conferat sive ad vitandas innumeras maculas, quas ex inordinata locutione contrahimus ; sive ad libertatem quamdam, quæ sensualitatem nutrit, coërcendam. Experiatur, & intelliget.

Silentium.

7 Si quando, labore & fatigatione urgente, aliquid cessationis fuerit necessarium ; non quærat colloquia, non alios advocet, non cir-

Quid cum cessandum est.

culos cogat: sed poterit solus per aliquod temporis spatium in horto, vel alibi ambulans, elevare ad Deum mentem; versiculis psalmodum, vel hymno aliquo, non quidem per modum intensæ orationis, sed ad relaxationem, & spiritum recreandum, gratias agendo, petendo, desiderando. Quibus si quis exercitatus fuerit, inveniet innumeros spirituales affectus, qui facile quasi de corde profluent: quibus non solum elevari spiritum, sed corpus etiam à labore sentiet recreari. Quod si aliqui id non experiantur, intelligant inde potius provenire, quod terrenas consolatiunculas confectentur, & otiosis narrationibus atque colloquiis delectentur.

*Quid cum
ad externos
vocatur.*

8 Cum ad externos vocatur, vel eos invitet, proponat & peculiari provisione statuatur cavere à facetiis, nugis, novis vel audiendis vel narrandis: & si incidant, pio aliquo colloquio interrumpat, captata ex iis quæ dicuntur, occasione.

*Peculiares
affectus vin-
condi.*

9 Si peculiari aliquo affectu, etiam naturali, & veluti sympathia affici se erga aliquem sentiat; curet statim initio omnem extraordinariam communicationem abrumperé, & communi tantum charitate illum amplecti (vix enim dici potest, quanta incommoda oblocutionum, detractio-
rum, delationum, suspicionum, inimicitiarum, conventiculorum, munusculorum, & simili-
lium

lium ex singulari, & extraordinaria communicatione oriuntur:) sed omnes uno spiritu complectatur.

10 Postremo orationi, & rebus internis plus se dedat: gustato enim spiritu, desipient nugæ istæ. *Orationis studium.*

Hic de tentationibus contra castitatem aliquid esset attingendum, quibus non est dubium, quin tales infirmi frequenter pulsantur, licet interdum attendere vel dissimulent vel negligant; sed & morbi ipsius periculum, & lapsus gravitas, & ignominia, & pleraque alia infirmos ad medicinam extimulant.

Sed quo pacto orationibus & jeuniis, poenitentis, occasionum fuga, humilitate, manifestatione tentationum, lectionis instantia, occupationibus sanctis, frequentia Sacramentorum, & plurimis aliis remediis occurrendum sit, pleni sunt libri Sanctorum. Quæ diversitate item curandi infirmi sint, si morbus incipiat ab anima per suggestiones, & redundet in corpus; vel contra, si ex carnis petulantia redundet in animam: quomodo, si cogitationes turpes importunæ, vel in phantasia pullulent ex malis habitibus, vel fiant immisiones per Angelos malos; quanta discretionem discernendum; quæ curatio adhibenda; hæc peti possunt à plurimis Doctoribus, qui ea de re copiose scripserunt, præsertim vero Sancto Bonaventura tract. de puritate

Quid cum carnis tentatione pulsantur.

Bonaventura tract. de puritate conscientie.

con-

& de refor. conscientiæ, cap. 12. & de reformatione men-
 mentis, tis parte 3. cap. 22. Gerson Cancellario de
 c. 22. exercitiis discret. simpl. de malarum cogita-
 Gerson de tionum causis atque remediis, cap. 3. & alibi
 discret. simpl. c. 3. sparsim.

Profunditas, & defectus claritatis.

C A P V T IX.

*Conscientia
 primum di-
 scutienda.*

I **P**RIMO monendus diligenter ut discu-
 tiat, & dispiciat attentius semetipsum :
 nam tenebræ hujuscemodi, quibus se celari
 quis cupit, fere conjunctæ esse solent cum te-
 nebris interioribus, ita ut in anima illa nec cla-
 ritas propriæ cognitionis, neque lux quædam
 in agendis, nec splendor divinorum soleat ap-
 parere; sed revera tenebricosa omnia & con-
 fusa, ita ut nec divinarum inspirationum &
 actionum motiones pacatæ sentiantur, nec
 pulchritudo virtutum sine magna nebula &
 fumo, imo etiam caligantibus oculis omnino
 cernatur.

*Quanti sece-
 rint Sancti
 Patres.*

2 Perpendat, quanti fecerint semper San-
 cti Patres hanc animi sinceritatem, & clarita-
 tem in agendo cum Superiore, & rectore spi-
 rituali; quam multa extent exempla, quid S.
 Basilii, Reg. ful. disput. resp. 46. ubi citat illud
 Proverb. 18. *Qui non medetur sibi ipsi, frater est
 sua opera dissipantis*, juxta LXX. nostra editio
 ha-

habet: *Qui mollis & dissolutus est in opere suo*, &c. quid Cassianus, quid B.P.N. quid denique omnes, qui de perfectione scripserunt, senserint.

3 Sciat nullo alio vitio ita aperiri ostium Satanæ, qui est spiritus tenebrarum, qui cum ejusmodi anima pro suo arbitratu sine ullo interpellatore libere agit, & multa facile persuadet; nec ullo alio vitio ita remediis omnibus occludi aditum: quare seipsum aperiendo, tentationes facile vincet, quibus tacendo succumbet.

Ostium diaboli est profunditas.

4 Si nihil aliud, ratio ipsa, qua tacetur, mala est & suspecta. Aut enim superbia prohibet, ne defectu manifestato vilior reputetur; aut negligit manifestare se, quia putat sine ullo duce suam sibi prudentiam sufficere, quod etiam arrogantiae & superbiæ est; aut humano aliquo fine sibi proposito veretur, ne hæc manifestatio sibi ad eum consequendum impedimento sit. Denique, si mediocriter se examinet, inveniet statim radicem ejus rei non bonam.

Ratio tacendi mala est.

5 Instruendus est, non solum hoc nomine non futurum eum Superiori minus carum, imò contra multo cariorum: nam non modo actus ipse manifestationis virtutis est, sed humilitas, quam hoc facto ille ostendit, desiderium curationis, fiducia cum Superiore, spes ipsa sanitatis, nescio quo, sed miro tamen modo longe amabiliorem Superiori reddunt, quam

Superiori fit amabilior & carior, se manifestans.

quam ipse defectus opinionem minuat: cum præsertim culpa in eo, qui se candide manifestat & juvari desiderat, non tam ut culpa, quam ut infirmitas, (quæ compassionem magis movet quam indignationem,) à Superiore spectetur.

*Superior
eum luere-
tur: quomo-
do.
Reg. 25.
Recl. & 26.
Præpos.*

6 Ad hoc vehementer juvat, si Superior juxta regulas, crebro & magna charitatis significatione, cum eo agat; ut opinio amoris, in Superiorem fiduciam generet, consuetudo minuat pudorem, & suavitas agendi erigat pusillanimitatem.

*Similis de-
fectus exem-
pla.*

7 Iuverit, si captata prudenter occasione, defectus aliquos, in quibus ille majori pudore suffunditur, de aliis nonnullis (tacito eorum nomine, nisi essent illi jam Sancti, & res narraretur in libris) ad exemplum adducat; addens diuturnitatem morbi, pugnae difficultates, modum victoriæ, vel alia, quæ ad rem facient, cumque extimulent ad vires concipiendas.

*Quid quan-
do ab aliis
manifesta-
tur.*

8 Cum ab aliis manifestatur, monendus suaviter, addendi stimuli, quare meritum sese manifestandi passus sit sibi præripi, cum etiam secundum hominem, qui se manifestat, minorem sentiat pudorem. Interdum, prudenter culpam extenuando doceat, non fuisse causam, cur tantopere rem celatam esse voluerit. Interdum docendo, hanc occultationem auxisse culpam per se non magnam. Interdum

ad-

addendo, ut videat quid mali faciat uel pusillanimitas, uel propria æstimatio: quia quod sola manifestatione facile fuisset curatum, jam factum est alicujus momenti, unde necesse sit petere, inquirere, examinare, & hujusmodi.

9 Hortandus, ut crebrius, etiam sine magna necessitate, conscientiam suam, & defectus aperiat; quo sic assuescat, & quotidie levius inveniet, & melius habebit. Addendum, si surreptio, vel mala consuetudo potuit culpam elicere, voluntate quasi dormitante, cur ipsa voluntas volens & vigilans non eliciat pro imperio longe facilius confessionem?

10 Monendus, si non videt, credat saltem, si non valde constanter contra se pugnet & vincat, fore ut in dies deterius habeat: nam & plura, & diu tacita manifestare, majorem adfert confusionem, & tacendi habitus contrahitur, & tenebræ augentur, & conscientia sensim obduratur.

11 Postremo proderit legere hujus rei documenta & exempla, meditari pericula eorum, qui ita vixerint: contra, serenitatem, meritum, conscientiæ tranquillitatem, & innumera bona eorum, qui confusione calcata sese manifestarunt, & dirigendos spirituali Patri tradiderunt. Denique perpendat apud se, an fuerit umquam aliquis sanitatis cupidus, qui morbum celaverit: an quis ita demens, qui

*Crebra conscientia red-
ditio.*

*Pericula ex
profunditate.*

*Lectio &
meditatio si-
milium.*

qui cum possit Patri spirituum Deo, omnia perspicue videnti, humili sua accusatione reconciliari, malit se cum confusione abscondere. Vere insania falsa.

Psal. 39. 5.

Iracundia, impatientia, vel aversio à fratribus.

C A P V T X.

Quando fuerint aversiones diuturnæ.

I S I fuerint aversiones diuturnæ; Primo monendus erit amanter, sed serio, quam hoc indignum sit Christiano homine, nedum Religioso, qui inter fratres vivens, unius moris & cordis cum ceteris esse debet. Et ut recogitet ex humilitatis defectu impatientiam nasci: ideo factum alterius, quo succensus videtur, non tam fuisse causam commotionis, quam manifestationem veritatis occultæ. Videnda quæ pulcherrime disputat Cassianus Collat. 18. cap. 13. 14. 15. & 16.

Cassian.

Per Confessarium reconciliandus fratri.

2 Extimulandus per Confessarium, nec sicut in ceteris imperfectionibus tolerandus diutius, quin efficaciter semel se vincat, & deposita omni amaritudine jungatur fratri, sciens nec orationes, nec actiones ceteras tales esse posse, quales oportet, nisi hoc diligenter fuerit emendatum.

3 Curet

3 Curet Superior, ut cum fratre quamprimum redeat in gratiam, nec ulla ratione permittat, si quando id contingat, ut signa communia salutationum, colloquiorum, & officiorum, & hujusmodi sibi invicem regent: quod ne in militibus quidem contubernalibus toleratur, nec ulla excusatione, aut dissimulatione id permittendum, tum quia grave est, tum quia magis dissensiones nutrit, & domi scandalum.

Per Superiorem reconcilietur quamprimum.

4 Superior alloquatur etiam illum, cui offensus est, ut is, quamvis nulla sua culpa ab illo ita tractetur, vincat tamen in bono malum, humiliet sese, adeat primus, blande hominem alloquatur, provocet modis omnibus ad charitatem. Denique ipse Superior vel alius sit mediator, ut omnino & absque mora res componatur.

Superior quomodo alloquatur offensum. Rom. 12.

5 Non admittat Superior, quod frigide dici solet, se per Dei gratiam nihil mali illi velle, non sentire in animo rancorem: tantum non posse illum libenter videre, non cum illo ex animo agere, diversitatem complexionis, morum dissonantiam non permittere, ut placide convivere possint. Hæc omnia refellenda sunt tamquam à nobis aliena, & excusationes in peccatis, atque amaritudinis germina à pessima radice profecta: nec ferendum, ut diutius venenum in pectore servantes, gravius afficiamur. Erimus enim in tenebris, & ira multa audebit.

Omnino tollenda amaritudinis causa.

Ad Profu-
turum
epist. 149.

debit. *Non enim erubescit in tenebris* (ait S. Augustinus) *cum super eam sol occiderit.* Luce quippe charitatis, & unitatis vel extincta, vel passionū & mali affectus nebulis & caligine præpedita, deteriora contingent in animo, sive in alterius, sive in proprium detrimentum, quam quæ in corpore solent in tenebris ambulant.

Charitatis
signa pecu-
liaria mutuo
exhibenda.

6 Efficiat, ut peculiaria signa charitatis exhibeat ei cui offensus est, cum illo amanter agendo; si quid potest, pro illo præstando; si infirmus fuerit, sæpius visitando, illi inserviando, etiam sensu reluctante. Denique urgeat, ne plus patiat in suo pectore virulentum indignationis affectum, quam Christi dulcedinem regnare. Idem agat cum altero, ita ut mutuis officiis charitas certet. Sic enim Deo juvante, sanabitur. Quod si alter in alterum rejiciat culpam, docendus quod Cassianus docuit, ubi agit de spiritu tristitiæ. Quæ quoniam egregie rem attingunt, & paucis graviterque illam explicant, placuit etiam hic adscribere. Sic

Quid cum
alter alteri
culpam im-
putat.

Cassian. l. 9.
c. 7. & 8.

itaque habet: *Ideoque creator omnium Deus opificii sui curationem præ omnibus noscens, & quia non in aliis, sed in nobismetipsis offensionum radices causæque consisterent; non deferenda præcipu fratrum consortia, nec vitari eos, quos læsos à nobis, vel à quibus nos arbitramur offensos, sed deliniri jubet; sciens perfectionem cordis non tam separatione hominum, quam patientiæ virtute conquiri: quæ firme possessa, sicut potest nos etiam cum iis qui oderunt pa-*
cem,

CAP. X. De impatientia & aversione à fratrib. 67

cem, pacificos conservare, ita si parata non fuerit, ab his quoque, qui perfecti ac meliores nobis sunt, facit jugiter dissidere. Occasiones enim commotionum, ob quas eos, quibus jungimur, deserere festinamus, in conversatione humana deesse non poterunt: & idcirco tristitie causas, ob quas à prioribus separamur, non evadimus, sed mutamus. Procurandum itaque nobis, ut nostra potius emendare vitia, & mores corrigere festinemus: quæ proculdubio si fuerint emendata, non dicam cum hominibus, sed etiam cum feris, & beluis facillime nobis conveniet, secundum illud, quod in libro B. Iob dicitur: Bestiæ terræ pacatæ erunt tibi: extrinsecus quippe venientia non verebimur offendicula, nec ulla poterunt scandala nobis de foris inferri, si in nobismetipsis intus radices eorum receptæ insertæque non fuerint. Pax enim multa diligentibus legem tuam, & non est illis scandalum. Psal. 119. 7.

Hactenus ille. Videnda etiam quæ libro 8. de spiritu iræ ponit, præsertim à cap. 8. usque ad 15. Legendus idem Collatione 16. Abbatis Ioseph de Amicitia, per totam, præsertim vero cap. 15. 16. & 17. usque ad finem. Ex qua tamen Collatione in cap. 27. nullo modo prætermittenda duxi pulcherrima atque efficacissima verba, quibus locum illum Apostoli explicat: Date locum iræ: Hoc est, inquit, non sint corda vestra sic impatientiæ & pusillanimitatis angustiis coarctata, ut violentam commotionis procellam, cum irruerit, sustinere non possint: sed dilatamini in cordibus vestris, suscipientes adversos iracundia, Iob 5. 23.

Psal. 118.
165.

Videndum
qua libro 8.
de spiritu
iræ ponit.

Rom. 12.
19.

1 Cor. 13. *cundix fluctus in illis extemis sinibus charitatis, quæ omnia suffert, omnia sustinet. Et ita mens vestra amplitudine longanimitatis ac patientiæ dilatata, habeat in se consiliorum salubres recessus, in quibus recipiunt quodammodo atque diffusus teterrimus iracundiæ fumus, protinus evanescat. Hæc de averfione & ira diuturna.*

Quid si fuerint subitaneæ hæc passionēs.

7 Si vero fuerint impatiëntia & ira vel excandescëntia subita, quæ frequenter contingunt, sed statim evanescunt; docendus erit occasiones antevertere, quibus se novit accendi, & paratus atque munitus accedat: cumque ebullire ferventiores spiritus senserit, saltem per aliquod spatium sileat. Vix enim credi potest, si verba affluere incipiant, quam difficile coërceantur, & quam animus excandescat: contra, si contineantur, facile sedatur & conquiescit.

Monendi domestici, ut vitent contentiones.

8 Moneat Superior domesticos, quos expedit, ut cum viderint illum iratum, vitent omnino contentiones, & suaviter colloquia declinent, vel prudenter ad alia transeant: alioqui excitantur rixæ, & commotione vehementius irritata, in ea prorumpitur aliquando, quæ etiam cum ira deferbuerit, facile emendari non possint.

Superior severe iratum na excipiat. Prov. 15.

9 Cum ad ipsum Superiorem iratus accesserit, & verba effuderit, qualia turgentes animo solent; caveat diligentissime, ne illum severe excipiat, sed molli responsione iram frangat.

Su-

CAP. X. *De impatientia & aversione à fratrib.* 69

Super omnia autem videat, ne verba aliqua arripiat & exaggeret, quæ ille incondita protulit. v.g. Quid est hoc? Quid dixisti? Ita ne Superiori? An oblitus es cum quo loquaris? Non meministi te esse Religiosum? & hujusmodi cetera. Hæc enim tunc vehementer accendunt, & alioqui satis per se exacerbatum exasperant: sed suaviter ad orationem hortetur, monens ut redeat ad ipsum, quem inveniet sui amantissimum; sperare se, ubi perturbatio illa humana conquieverit, fore ut omnia bene componantur. Vbi deferbuerit spiritus, & redierit quietus, tunc paterne corrigat. Ita tamen, ut etsi illius culpæ & commotionis turpitudine illi ostendatur, tamen animatus semper ad emendationem, & bona spe ille recedat. Novimus enim aliquos præ vehementia usque ad pallorem & tremorem affectos, etiam dimissionem à Societate in illo fervore petiisse: deinde placide à Superiore placatos, rediisse non solum poenitentes errati sui, & humiliores, sed etiam quietiores & promptiores, quam ante commotionem fuissent.

10 Caveat in primis, ne ipse vicissim, ut fieri potest, offensus verbis incipiat etiam turbari, & perturbato animo verba verbis rependere; hoc enim pessimum esset & perniciosum: sed si quid contra se jactet, non magis moveatur contra illum, quam soleat mater inserviens contra filium phrenesi laborantem, cujus

*Superior non
turbetur.*

dicta vel facta compassionem ei potius, & lacrymas teneritudinis, quam stomachum movent.

Quid Superiori facendum, si in hoc deliquerit.

11 Efficiat, ut quoties in hoc errare contigerit, assumat ille sibi levem aliquam pœnam, quam cum primum solvat: hoc enim facile & leve medicamentum, tum ex humilitate, tum ex aliqua interruptione illius turbidi affectus, tum ex impetratione divini respectus & misericordiæ, non levis esse momenti, si perseveraverit, experietur.

Particularis examinis usus.

12 Tandem addat examen particulare, adhibeat peculiare orationes, petat publicas reprehensiones & pœnitentias: si enim constanter egerit, non modo sanabitur, sed mutabitur in mansuetum, tractabilem, & patientem.

Laxitas in observatione Regularum, & conscientia minime timorata.

C A P V T XI.

Meditari cur omnia reliquerit.

I **M**ONENDVS ut consideret, quo fine tanto apparatu relinquendi omnia, parentes, bona, honores, &c. seipsum alieno subjecit

jecit imperio ; nimirum ut ad perfectionem , & cordis puritatem tenderet. Quare ergo post tot labores & egregia facta ita desipit in minoribus , ut ex ista laxitate illud non apprehendat , ob quod solum apprehendendum tanta præstitit ? Multa possunt adferri exempla , ut hæc stultitia manifestetur.

2. Intelligat , aliud esse ex subreptione in multis delinquere , sed in virtutibus tamen strenue se exercere , tentationibus resistere , proponere meliora frequenter , ad perfectionem adspirare , nihil negligere ; ubi erraverit , statim teneritudine conscientiae compungi , surgere alacriorem , jacturam levem majori fervoris , atque virtutum lucro resarcire ; aliud vero esse id , quod ipse facit , facile delinquere , nullo metu stimulari , ubi manifeste mortale non suspicatur , leviter contemnere , ex imperfectione non solum non assurgere ad meliora , sed de una in aliam quasi sponte volutari. Itaque ne sibi blandiatur ad insipientiam sibi usurpans illud , quod similes solent : *In multis offendimus omnes ; & , Septies in die cadit justus* : hæc enim gemitibus potius digna sunt , quam ut ita quasi levi joco dicantur.

3. Nisi caveat serio ab hac tepiditate , videat ne cadat in profundum. Solet enim ista Deo vomitum provocare . Legatque Cassianum Collat. 4. de Concupiscentia carnis , cap. 19. lib. 4. de Instit. renunc. cap. 34. ubi egregie

Aliud est ex subreptione aliud facile delinquere.

Iac. 3. 2.
Prov. 24.
16. ut S.
Greg. in c.
1 Reg. c.
15.

Tepiditatis effectus.
Apoc. 3.

docet, quod experientia compertum est in plurimis, hujusmodi homines magno in periculo versari. Quod si etiam in graviora non cadant, Domino miserante, tamen nihil præclarum ad Dei gloriam, nihil ad proximorum utilitatem, vel Societatis ædificationem ab iis posse expectari. Et si nihil aliud, certe vita ipsa repidorum valde misera est, & intolerabilis, & ut S. Bernardus loquitur, plena miseriæ, & doloris, & inferno plane proxima, umbra mortis jure censetur. Videnda, quæ idem Sanctus egregie docuit in hæc verba: Sunt iterum multi inter nos, &c. & ser. 6. ibi, Contra sane invenire est homines pusillanimes & remissos, &c.

S. Bern. ser.
3. & 6. de
Ascens.
Profellum
in spiritu
examinet.
De itiner.
Æter. 4.
dist. 4. ar. 2.

4 Videat qui ejusmodi est, & inspiciat profundius intra se, quæ signa habeat proficientis jam, ut S. Bonaventura loquitur, roboratæ charitatis, qui post abrenuntiationem, & tantum temporis in hac via consumptum, certe plura deberet habere. Quis sensus filialis & casti amoris cor ejus pungat, ut tanto Patri, talique sponso timeat displicere? hæc divitiæ salutis, hic thesaurus juxta Isaiam. De quo timore Cassianus pulcherrime, *Vel tenuem*, inquit, *amoris formidat offensam, atque in omnibus non solum actibus, verum etiam verbis attonita semper pietate distenditur, ne erga se quantulumcumque fervor dilectionis illius intepeascat.* Hæc ille. Plangat igitur sub religioso habitu animam sæculare, exurgatque velociter.

Is. 33.
Cass. Coll.
11. c. 13.

5 Quot præclaras merendi actiones, & *Quanto merito se pri-*
 quot obedientiæ, virtutum actus sibi permit-
 tat elabi: nec dubitet se in dies majores mentis
 tenebras, & pertinaciorem conscientiæ duri-
 tiem incursum.

6 Numquam in electione eorum, quæ agere *Semper per-*
 intendit, perpendat tantum, an hoc mortale *fectionis ha-*
 sit, necne; sed assuescat potius considerare, an *benda ratio.*
 hoc majoris sit perfectionis, & an magis Deo
 placeat, an illum vel leviter contristet: quale
 enim signum est amoris, illo modo agere cum
 Deo? aut quis ferat filium dicentem: Revera
 diligo patrem; sed citra lethalia vulnera, &
 mortem, quidquid ei injuriarum & molestia-
 rum inferre potero, faciam omnia sine respec-
 tu ullo & liberrime: nec tantillum curo, ma-
 gis an minus ei placeam, modo me hereditate
 non priver, vel morte puniat.

7 Et si aliquando pro transgressione Regu- *Qualiter ju-*
 larum, & nimia libertate bonum est ei etiam *vandus.*
 pœnitentias injungere; sciat tamen Superior
 hac medicina numquam tales ad sanitatem
 mentemque reduci. Quare qui hoc morbo la-
 borat, excipiendus erit serio, & secreto ac gra-
 viter arguendus, ut de statu vitæ suæ diligenter
 deliberet, seipsum intra se colligat, oblationem
 perpendat, ac si denuo de Societatis ingressu
 cogitaret.

8 Cum in aliqua re graviore deliquerit, *Quid cum*
 puta dando vel accipiendo, vel hujusmodi, *in re gravi*
 & *peccat.*

Eccl. 19. 1.

& quantitas fuerit alicujus momenti, etiam si revera non pervenerit ad mortale; tamen perurgendus erit de periculo, & dubio, ne mortale admiserit; & ita terrendus, ut videat quam verum sit illud: *Qui spernit modica, paulatim decidet.* Si litteras acceperit vel miserit infcio Superiore, graviter objurgandus: Videat quo tendat, caveat insidias Satanæ; non suadere illum ista, quæ laxis leviora videntur, nisi ut pertrahat ad graviora. Si de aliquo murmura-verit, vel denique aliquid paulo gravius admiserit; ibi paterne quidem, sed valde serio monendus, & pœnitentiæ, capitula, & alia addenda, sed præcipua tamen vis, ut dictum est, in privata admonitione ponenda. Si nonnullis res innotuit, coram illis etiam, si ita expedit, erit arguendus, ut saltem erubescat, sciatque se sub iugo Domini esse.

*Associandus
alicui spiri-
tuali viro.*

9 Assignetur ei aliquis contubernalis, vel in officio collega, cujus exemplo & observantia confundatur & incitetur; cujus colloquiis, data occasione, accendatur. Hæc enim interdum magis movent, & pudore afficiunt, quam consulto adhibitæ correptiones.

*Exercendus
serio in spi-
ritualibus
exercitiis.*

10 Denique collectio ad interiora, spiritualia exercitia, meditationes de perfectione, seria & non perfunctoria examina, etiam particularia, & quidquid ad spiritum instaurandum confert, huic proderit. Et quoniam infirmitas hæc valde similis & conjuncta est secundæ,

cundæ, id est, languori spirituali, quæ dicuntur in secundo capite fere plurima, huic etiam prodesse valde poterunt.

Imaginatio infirmitatum, adspirare ad quietem, recusare ministeria.

CAPUT XII.

ANTE omnia Superiori cavendum, ne cum aliquis alioqui vir bonus, & qui aliquando cum ædificatione laboravit, infirmitatem præterdit, & à laboribus se excusat, facile eum damnet quasi imaginativum & fugitivum labores: hoc enim vehementer contristat, & sæpe revera duritiem sapit, non credere affirmanti. Sed si ex medicorum relatu, & nonnullis signis deprehendat aliquid esse admixtum imaginationis & otii, tunc caute procedendum.

Non facile dammandum.

I Itaque etiam sic affecto magnum ostendat compassionis affectum, consulat medicos, & deinde eos secreto interroget. Et quidem initio bonum erit, si infirmus à medicis ipsis animetur, bona spe recuperandæ cito sanitatis; deinde ab Infirmario, & aliis domesticis: tum suscipienda est illius cura diligenter per aliquot

Compatiendum sic affecto.

76 *Industriæ ad curandos animæ morbos.*

quot dies , illique spes facienda , fore ut brevi melius habeat , ita ut paulatim ipsemet hanc cogitationem deponat , afferatque se jam melius habere: quod non semel in nonnullis contigit.

*Quid cum
infirmitas
non appareat.*

2 Si pergat, & infirmitas non appareat, sed prætexat ille defectum quemdam vtrium , & magnam capitis fatigationem , & hujusmodi alia, in quibus se diu fuisse affirmet; tunc major etiam piæ compassionis affectus ostendendus , addendaque illa , quæ ipsemet putet fore sibi utilitati , puta deambulatio frequentior , particularitas aliqua parui momenti in cibo, potu, somno, &c. Vbi vero per aliquot dies ita fuerit cum caritate & suavitate tractatus, ut facile sibi persuaferit Superiorem ex caritate agere ; expedit illi proponere , an non vita illa otiosa molesta illi sit & melancholiam generet? affirmabit sine dubio. Interrogandus , quid ergo cuperet, quid putaret fieri posse, quod juvaret? inveniet aliquas relaxationes & recreationes extraordinarias : ex iis aliquæ reiiciendæ, sed cum significatione compassionis , tamquam impediētes aliorum occupationes & ministeria ; videbit enim etiam aliorum habendam esse rationem : nonnullæ bono aliquo colore, præsertim tamquam ipsi minus commodæ declinandæ: aliquæ, licet non necessariae, pia quadam indulgentia concedendæ.

Alia remedia adhibenda.

3 Curandum contra quam in vere indigenti-

CAP. XII. De imaginatione infirmitatis. 77

gentibus fieri debet, ne alii conversationibus & confabulationibus ejus otiositatem nutriant: sed relinquatur solus, ut vel fastidio victus legat aliquid vel faciat, & ab otio incipiat abhorreere.

4 Interrogetur, quid magis sibi nocere experiatur, quod genus occupationum molestius ferat. Dicer duo vel tria: abstineatur ab illis, inveniantur aliæ occupationes, quibus sensim vel ad levandum tædium, vel ad minuendum fastidium non inuitus occupetur: vix enim fatebitur se ad omnia inutilem.

Alia dantur occupationes.

5 Petatur contra, quænam illi videantur posse sine magno sui detrimento ab eo attingi: & illa experiatur, videat quomodo succedant, animetur, detur aliquis adjutor, minuatur consuetæ tempus occupationis: si non potest per duas horas, occupetur per unam: si à confessionibus abhorret, interrogetur an in studio concionum, an in docenda doctrina Christiana, an in aliquo exteriorum officio possit occupari, & paulatim eo deducendus, ut aliquid aggrediatur.

Et quas ferre posset.

6 Vbi aliquod tempus effluxerit, poterit suaviter moneri, ut videat, ne cum plura forte præstare possit, privet se, Societatem, & proximum eo fructu, qui ex illius laboribus colligi posset. Negabit: urgendus suaviter, ut tentet saltem ad breve tempus.

Post aliquod tempus urgendus suaviter.

7 Paulatim vero, post exhibitam compassionem

Quid post longanimitatem.

sionem & longanimitatem, ex temporis spatio & experientia magis habebitur, unde possit acrius extimulari & moveri; ne etiam si vera sit secundum rem debilitas, habeat forte aliquid imaginationis admixtum: adferenda autem erunt exempla; fuerunt enim patres maturi, pii & graves, qui huiusmodi morbo laborarunt, qui postea credentes medicis, sola obedientia curati sunt. Nec defuit, qui ex apprehensione tenaciori putaret se homicidam futurum sui, si medicis in victu, & cura ejus, quam prætendebat, infirmitatis, obtemperaret. Asserebat enim se tam evidenter de vita periclitari, si medicis acquiesceret, ut nulla ratione id, salva conscientia, posset: quem cum Superior, adhibitis etiam Theologis, juberet securum esse, & deponere scrupulum, quem in se susciperet, acquievit tandem, & Deo juvante, curatus est.

8 Sed & illud animadvertat Superior, ne domi obloquentur aliqui contra illum, ne morbum tristitia exaggerent; neque contra ita ostendant se credere, ut illum in sua imaginatione confirment; sed semper ita loquantur & sentire se ostendant, illum esse virum talem, cui credere debent; fore tamen, ut animatus plus possit; adhibeat curationem, credatque medicis, Superiori acquiescat, sibi que persuadeat, occupationibus moderatis magis excitari, & juvari naturam, quam opprimi. Quid faciet, cum otio marcescet? erit sibi ipsi gravis: &

*Obloquia
ceterorum
coercenda.*

& alia, quæ in hanc sententiam cum modestia, & significatione compassionis adferri utiliter poterunt.

9 Postremo, si æris mutatio tamquam utilis ab ipso apprehenderetur, Provinciali significandum, quam etiam medici valde commendunt; polliceanturque ex hac mutatione fore omnino, ut vires reparet. Sunt enim melancholici in impressionibus, & apprehensionibus mirabiles: & fieri posset (quod non semel contingit) ut nulla vere facta in corpore mutatione, existimaret se ex illa loci mutatione plane restitutum, & aggrederetur magna. Si vero sit in loco, unde etiam difficile avellatur, tunc medici urgeant magis loci mutationem, & forte statim dicet, se melius habere ubi est, & incipiet aliquid facere, ne cogatur inde discedere, ubi libenter habitat. Hæ sunt infirmitates humanæ, tolerandæ patienter, & curandæ suaviter.

Cali mutatio.

*Tentatio contra institutum, & aliquot
Regulas, quæ non placent.*

C A P V T XIII.

*Hujus mor-
bi difficul-
tas.*

MORBVS hic plane periculosus est, & valde curatu difficilis, præsertim in antiquioribus. Itaque investigandus est diligenter, & detegendus solemter, & accurate curandus; solent enim hujusmodi homines morbum alte celare, & nisi occasio aliqua quasi non advertentibus aliquid extorqueat, vix se prodent, nisi cum iis, quos potuerint subodorari ejusdem esse sententiæ.

*Oratione ju-
vandus.*

1 Ante omnia igitur tamquam pro graviter & periculose ægrotante orationes indicendæ domesticis, tum cura ejus infirmi suscipienda diligentissime.

*Hortandus
ad se ape-
riendum Su-
periori.*

2 Curetur itaque in primis, ut sese confiderenter aperiatur, dicatque quibus in rebus Instituti tentationem patiatur; an fuerit illa diuturna, quâ occasione orta, quibus accidentibus aucta; an dubia sua cum aliquo communicaverit, præsertim Superiore; quomodo & in quibus ei satisfactum; quid nunc est, quod eum maxime angat, ne dubitet se sincere manifestare. Forte enim aliqua eum affligunt, quia falso apprehen-

CAP. XIII. De tentatione contra Institutum. 81

apprehendit : forte quia modum ille tractandi non intelligit (id enim multis contingit , qui non tam veris , quam animo conceptis & apprehensis difficultatibus in rebus torquentur hujusmodi) nec dubitet Deo adiutore , posse si demonstretur , spinam evelli , quæ pungit occulta : non esse eum vel solum , vel primum , qui talia passus sit. Sed quoniam non omnes Superiores eam habent Instituti notitiam , aut prudentiam , ut satisfacere possint ; & occurrentes objectiones sive intellectu illarum rerum , sive praxi commode diluere ; omnino expedit , nisi esset Rector maximi Collegii vir prudens , gravis , & in his versatus , eum infirmum ad Provincialem mittere.

3 Vbi aperuerit ille morbum , dicet forte ea , in quibus fere tales impingere solent ; scilicet , non probari sibi diversitatem graduum , Professionis dilationem , tam amplam Superiorum potestatem , reddere rationem conscientiae , manifestationem defectuum & ceterorum per quemlibet qui extra confessionem ea sciret. Hic ergo Superior aggredietur hominem , ponatque ei ob oculos morbi gravitatem , ut sciat , nisi diligenter curetur , non magis eum futurum in Societate quietum , vel forte etiam perseveraturum , quam si Carthusianus aliquis. v. g. moraretur inter Franciscanos , cujus Religionis nullam sensit , aut adhuc sentit vocationem. Itaque accin-

Detegenda morbi gravitas.

Docendus de singulis.

F

gat

Gen. 3.

Rom. 8. 6.

2 Cor. 1.

Ca. Trian.
Collat. 18.
c. 3.

gat se ad opus, dicatque primo, an hæc omnia intellexerit biennio Novitiatus, an in tot renovationibus Votorum. Respondebit haud dubie se vidisse, sed tunc non bene percepisse, postea autem apertis oculis plenius perspexisse. Sane videat, ne nunc male apertos habeat, sicut primi parentes ad videndum suam confusionem. Vere enim carnis prudentia ad male videndum ejus aperuit oculos, quos innocentia feliciter clauserat, aperiendos ad ea, quæ sunt Spiritus Dei. Et certe ita contingit, ut remoto lumine sancti Spiritus, & vocationis, quæ omnia in suis, verisque coloribus apprehenderat, nunc resumpta lucerna carnalis & naturalis intelligentiæ, non eodem modo videat. Quare hoc potius deslendum, resumendumque primum lumen: *nam & prudentia carnis mors est: & in lucerna propriæ naturæ, quæ semper seipsam quærit, quæ mortificationis, abnegationis, & perfectionis sunt, pulchra & lucida, uri sunt, apparere non poterunt: quippe cum Apostolus animalem hominem asserat, ea quæ sunt Spiritus Dei, percipere non posse, quia stultitia est illi. Et vere ac sapienter à Piammone dictum est apud Cassianum: Numquam rationem veritatis intrabit, quisquis à discussione cæperit erudiri: quia videns eum inimicus suo potius, quam Patrum judicio confidentem, facile in id usque propellit, ut etiam illa, quæ maxime utilia ac saluberrima sunt, superflua ei videantur & noxia.*

Atque

Atque ita præsumptioni ejus callidus hostis illudit, ut irrationabilibus definitionibus suis pertinaciter inhærendo, hoc solummodo sibi sanctum esse persuadeat, quod rectum atque justissimum suæ tantum obstinationis errore censuerit.

4 Ostendendum, fere hæc omnia non esse in Societate nova, usurpata esse à sanctissimis Religionum Fundatoribus, & antiquissimis Patribus: adducenda loca Sanctorum, Basilii, Benedicti, Augustini, Pachomii, Cassiani. Quod si quibus minus probantur, in perfectionem Institutorum, & religiosæ exercitationis, imperfectorum hominum moribus & desideriis metiuntur, ut quadam veluti Lesbia regula, non pulchrum & rectum, sed deforme potius & distortum, si non ruinolum plane construunt ædificium.

Ostendendum non esse nova in Societate.

5 Addendum, fuisse hæc sæpius non solum à Societate universa in generalibus Congregationibus, atque à tam multis Patribus doctrina & religione præstantibus examinata, sed etiam Summorum Pontificum, & Sanctæ Sedis Apostolicæ jussu, non semel diligentissime perpenſa. Et nuper Sixti V. fel. rec. qui nonnullis Theologis, & gravissimis Cardinalibus cum examinanda dedisset; illique nostris responsis auditis, & scripto traditis, etiam accurate examinatis, ad Pontificem retulissent, nihil plane ille immutavit. Imo vero Gregorius XIV. sanctæ mem. qui ei successit, amplissimo

A Congregat. gener. & a Summis Pontificibus approbata.

diplomate ea explicavit, & confirmavit.

*Investiganda
radices.*

6 Examinet radices, unde hæc displicentia oriatur, & inveniet nonnullis in rebus esse ex falsa intelligentia. Hæc declaranda, & abigendæ tenebræ, quæ mox disparebunt. In nonnullis plane ex malo affectu, superbix v.g. non placet diversitas graduum, quia vult esse Professus: non manifestatio conscientix, quia esse vellet occultus: non deferri ab aliis, quia nollet opinionem minui. Denique percurrat singula, & hoc ipso se judicet, quo videt, unde proveniat. Illud etiam consideret, si radices maneant inquietudinis, nihil referre an hoc vel illo objecto turbemur. Satis enim apparet in aliis Religionibus, ubi nonnulla quæ apud nos sunt, non habentur, plurimos esse plusquam male contentos, alios manifeste apostatare: itaque non hæc, quæ illi displicent, in causa sunt; sed radix ipsa interior, quæ si sanetur, salva erunt omnia. Quod in nonnullis manifeste constat, qui cum turbati multa ex iis improbarint, ubi collecto spiritu conspiceretur potuerunt, tranquillo animo usque ad finem perseverarunt.

*Promissio
falsa Deo &
pactum cum
Societate.*

7 Dicat sibi ipsi, quoties, Beatissima Virgine & Angelis testibus, hæc Deo promiserit, an non cum Societate pactum inierit, firmans etiam Scriptura, se contentum esse omnia servare; an nunc liceat in re tam gravi promissis non stare, sine quibus numquam fuisset

in

CAP. XIII. *De tentatione contra Institutum.* 85
in Societatem admissus, ut post tot annorum
spatia renuat, seque affirmet quietum esse non
posse?

8 Suaviter docendus (quod certe mani- *Quantum*
festissime demonstrari potest) quantopere *valeant.*
hæc valeant ad spiritualis vitæ profectum, &
omnimodam abnegationem, quam, si menti-
ri nolit, in sua vocatione quæsit. Percur-
rendum per singula, & ita eorum omnium
speciositas & pulchritudo elucidanda erit, ut
ejus animum suo splendore alliciant. Quod
certe possunt mirifice: ut in iis apparet, qui
gratia vocationis illustrati ea perspiciunt in lu-
mine Dei.

9 Dicit forte, non tam hæc in Instituto & *Solentur*
legibus I G N A T I I, quam in praxi displicere *objectiones*
ei, quod male à Superioribus practicentur. *contra Insti-*
tutum.
Sed primo injuriam irrogat sanctissimo Fun-
datori: an enim ille non vidit, eas leges ho-
minibus, & pro hominibus, & ab hominibus
administrandas se tradere? Vidit utique, nec
ignoravit, posse interdum errari: sed rursus,
posse sancte tractari. At ejusmodi leges con-
dere, quæ Angelis, non hominibus conve-
niant, hominis fuisset minime prudentis. nec
Dei Spiritu pleni, quales Religionum Fun-
datores esse oportet. Quod si non leges illas,
quasi usu ipso minime faciles & commodas
accuset, sed aliquorum Superiorum praxim;
jam non Institutum, sed personæ displicent:

de quibus alia ratio est ; & in quibus , retenta Instituti puritate , emendari possunt quæ desiderantur. Secundo, Cur tam multi viri gravissimi & doctissimi sunt , qui integritatem hujus administrandæ legis collaudant, & Deo gratias hoc nomine agunt ? cur & ipsi hæc mala non vident ? cur ipsemet infirmus , si de sua causa non ageretur , tam oculatus non esset ? at in propria causa , & in se judicando , quam proclive est falli ? Deinde hortandus , ut dicat in particulari : & in singulis ei satisfieri poterit, nisi malit protervire ; modo illud statuatur, quod negare non poterit , judicium de sufficientia , talentis, virtutibus, non modo in iis, qui se plane totos Deo & Religioni tradiderunt , sed ne in sæcularibus quidem cujuscunque status , non posse esse penes eum, de quo agitur. Ad cetera omnia facillima est responsio.

*Spirituali-
bus exerci-
tius juvan-
dus.*

10 Hortandus , ut præmissis aliquot exercitiis spiritualibus , præsertim de beneficio vocationis , & obligatione ad perfectionem , paret se ad generalem confessionem : benigne animandus , difficultates molliendæ , non omnes futuras quas suspicatur ; sed ut in rebus humanis contingit, ex decem vix duæ orientur: se etiam paratum ad illum juvandum , & consolandum. Denique ostendat revera multa apprehendi difficilia à longe , quæ re ipsa non ita sunt. Se etiam pro sua virili amanter explanaturum, ubi potuerit.

C A P. XIV. De tentatione contra Superiores. 87

I I Prohibeatur omnino, ne hos conceptus cum aliquo communicet, tum propter privatam suam utilitatem, tum etiam propter communem. Quod si tamen faceret, vel inquietum post hæc omnia se ostenderet, Præpositus Generalis tempestive monendus erit.

Interdicendum ne alius communicet.

Tentatio contra Superiorem, cum aversione & diffidentia.

C A P V T XIV.

I A N T E omnia tollenda quædam tentatio est ab ipso Superiore, ne putet huius infirmitatis culpam totam esse in infirmo: debet enim credere, posse etiam in se ipso non exiguam esse partem, & si non committendo aliquid, quod etiam interdum evenit, saltem omittendo: vel si in re non peccavit, potuit forte in modo peccare. Existimet ergo etiam se debitorem esse, examinet causas, & corrigat quod in se est, memor præcipue illius sententiæ D. Gregorii ad Bononem Abbatem: *In correctione hunc esse ordinem noveris observandum, ut personas diligas, & vitia persequaris.* Et quod paulo post addit: *Sic vulnus debes abscindere, ut non possis ulcerare quod sanum est: ne si plus quàm res exigit, ferrum imprefferis, noceas cui prodesse festinas.*

Quid in se disquiras Superior.

Lib. 9. ep. 8.

Qua via tenenda à subdito hanc suspicionem tollendi.
Pastoral.
p.2.c.8.

2 Cum videat infirmum à se aversum sanari non posse, nec medicamenta admittere, nisi suspicionem deponat; faciendum omnino, quod idem Sanctus Pater monuit, ut Pastores dilectionem suam quasi quamdam viam faciant, per quam corda audientium ad amorem Conditoris sui introducant. Difficile quippe est, ut quamlibet recta denuntiatio prædicator, qui non diligitur, audiatur. Ergo quæcumque monita, quæcumque remedia adhibeantur, nihil illi proderunt: imo interdum nocent magis, quia putat ille ea omnia non ab amore, sed aliunde proficisci.

*Superior ferat Subditi imperfectio-
nem.*

3 Itaque si quid murmure, aut conqueratur contra illum; factus velut homo non audiens, caveat diligentissime, ne aut cum eo, qui detulit, aut cum alio quopiam ita loquatur, ut ostendat se etiam vulneratum, aut ita rem exaggeret, ut dicat, hæc tolerari non posse, omnino illum severe castigandum; non esse tales dignos, qui in Societate retineantur, & hujusmodi alia. Sed cum mansuetudine semper illud potius: Doleo bonum fratrem in hæc prorupisse, præsertim cum Superioris personam teneo: cuperem omnino suspensiones hæc evellere ex ipsius animo: ex passione vehementi ista dixit: compatior illius infirmitati, cum præsertim hæc, quia in alios redundant, & scandalum pariunt, aliquo remedio indi-

CAP. XIV. De tentatione contra Superiores. 89

indigeant : oremus pro illo : videamus quid consilii capiendum : sanare eum potius , quam humiliare cupio.

4 Aggrediatur eum in spiritu charitatis , *Spiritu charitatis iuvandus.*
capiens hoc modo vulpeculam , id est , detractorem , & capiat Domino , hoc est , lucretur in lenitate fratrem suum in Christo. Qua de re cum egregie dicat S. Bernardus , verba Serm. 63. in Cant.
illius , ut aptissima , apponam. Explicans enim verba illa Canticorum : *Capite nobis vulpes parvulas* , hæc attexit : *Pessima vulpes , occultus detractor ; sed non minus nequam , adulator blandus. Cavebit sapiens ab his. Dabit operam sane quod in ipso est , capere illos qui talia agunt ; sed capere beneficiis atque obsequiis monitisque salutaribus , & orationibus pro his ad Deum. Non cessabit istiusmodi carbones ignis congerere super caput maledici , & item super adulatoris , quousque (si fieri potest) & illi invidiam , & isti simulationem de corde tollat , faciens mandatum Sponsi dicentis : Capite nobis vulpes parvulas , quæ demoliuntur vineas. An non ibi captus ille videtur , qui suffusus ora rubore , quippe proprium erubescens iudicium , ipse suæ confusio- Rom. 12. 20.
nis & poenitudinis testis est , sive quod oderit hominem amore dignissimum , sive quod dilexerit tantum verbo & lingua eum , à quo se diligere opere & veritate vel sero experius est ? Captus plane , & captus Domino , secundum quod nominatim ipse expressit , Capite , inquit , nobis. Utinam ego omnes adversantes mihi sine causa , ita capere possim ,*

possim, ut Christo eos vel restituam, vel acquiram.

De murmurationibus contra Superiorem per alium monendum.

5 De murmurationibus & aliis, quæ ipsum Superiorem attingunt, melius est, si per alium moneatur, præsertim Confessarium, & Præfectum Spiritualium; à quo paterne ostendatur illi macula, & aliorum offensio: interdum à Ministro, nonnumquam etiam, si ipse aderit, à Provinciali valde serio, indicando scandalum, & culpæ gravitatem. Ipse vero Superior multa, quæ ad se pertinent, ostendat se nescire. Si enim intelligat is, qui offendit, illa ad Superioris notitiam pervenisse, vix poterit sibi persuadere, Superiorem non esse propterea exulceratum, & erga se male affectum.

A gravioribus Patribus juvandus.

6 Interdum Provincialis, ipse Rectoris Admonitor, Spiritualium Præfectus, vel aliquis ex gravioribus, cui præsertim tentatus confideret, indicent illi hanc opinionem vere ex falsa apprehensione conceptam, majoris esse damni, quam ille putet: hanc nisi deponat, cum futurum semper inquietum: obedientiam numquam esse posse, qualem Deus & Constitutiones exigunt. Si Superior non taceat, monita salutaria verti ei in venenum; si taceat, quotidie in deteriora lapsurum: videat quid agat, & sibi consulat. Offerat præterea qui tentatum sic juvare aggressus est, se cum Superiore acturum efficaciter, ut illum amanter amplectatur: sperare se, non futurum hoc difficile, quod noverit bonam Superioris voluntatem

tatem erga illum, quam signis & verbis sibi frequenter ostenderit. Proinde cum egerit, se relaturum. Agat, deinde magis confirmet, animet, ut omnino per se adeat Superiorem, ei-que penitus aperiat vulnus, manifestet suspiciones omnes, omnes querelas; polliceri se, libenter illum audiendum, atque omnino disiectis umbris fore omnia lucida & pacata. Sed ille non facile ad id adducetur, objiciens Superioris erga se aversionem cognitam, duritiam, verborum asperitatem, denique verendum, ne congressus hic accendat potius, quam extinguat humores. Non ideo cessandum, sed sæpius is erit urgendus, ut saltem vocatus eat, modo revera Superior se ad dulcedinem composuerit.

7 Vbi ventum fuerit ad colloquium, invitet eum Superior hilari fronte, ut omnia aperiat, quia alioqui numquam pacem inveniet: polliceatur fructum, promittat se, si quid revera in eo desideretur, facile mutaturum, quia non alio animo, quam ex charitate fecit. Si quid vero ex sinistris & falsis imaginationibus ortum habeat, se dilucide ostensurum, etiam adhibitis testibus, ipsum falli. Deinde sinat eum motus animi sui aperire, licet verbis incompositis & acerbioribus; nec tam illa attendat, quam infirmitatem. Vbi se aperuerit, excipiat eum suavissime, incipiat docere in singulis, in hoc & illo penitus eum falli. Dicat

quæ

*Quomodo se
gerat Superi-
or in collo-
quio.*

quæ fecerit contra pro illo, citet in hoc aut illo facto testes talem vel talem : si in hac vel illa re aliquid negavit petenti, non potuisse aliud fieri. Si iniunxit pœnitentias, non fuisse nisi ordinarias. Si exploravit, vel aliquid de illo voluit sciscitari, fuisse conscientia coactum propter ea, quæ referebantur ; quæ licet facile non crederet, tenebatur tamen ut pœstor quærere. Si ostendit in nonnullis minorem fiduciam, quod non ei hæc aut illa injunxerit, vel fuisse quia externi alium petebant nominatim, vel quia genus illud negotiorum ob naturam ejus & præsentem statum, minime crederetur illius spiritui profuturum ; vel quia nostri vel externi offendebantur ejus agendi modo. Polliceri se omnem charitatem, omnem fiduciam : incipiat ipse mutare modum, & videbit quanta illum Superior charitate complectatur. De his autem, in quibus mutare debet, melius esse ut redeat commodius auditurus, longiorem fuisse sermonem : interim oret uterque, & veniat ipse animatus ut audiat, nam ex amore fore omnia. Non minus quippe diligit charitas, cum monet & obiurgat, quam cum blanditur ac fovet : sperare in posterum omnia meliora. Hæc omnia fiant tamquam à patre, blande & amanter : & omnino caveat Superior disputationes & altercationes : hoc enim minuit auctoritatem, & gignit majores amaritudines. Addat præterea super omnia (si

CAP. XIV. De tentatione contra Superiores. 93

(si forte contigerit eum aliqua contra ipsum Superiorem dixisse, quæ putet relata Superioris ipsius animum pupugisse) ut sibi certissime persuadeat, nihil in ejus animo propterea amaritudinis refedisse; imò se tanto magis à Superiore diligi, à quo impensiora charitatis signa experietur; quique nullam aliam hujus dilectionis compensationem petit, nisi ut se ille in posterum sincerum fratrem exhibeat, & cum magna fiducia tamquam ad patrem accedat, fore sine dubio ut ejus fiduciæ Superioris facta respondeant.

8 Vbi cœperit remitti febris ardor, moneat illum de gravioribus, excusans tamen quoad potest, vel aliquam imprudentiam, vel intentionem ejus. Inculcet aliorum offensionem, nostrorum & externorum, qui sæpe conquesti sunt. Commemoret aliqua bona quæ fecit, addens cur maculam inferat, cur multa bona impediatur, quæ præstare posset. Admisceat aliqua leviora errata, quæ ostendat, se nihili facere: doceat tamen quam facile, & quanta cum laude ac merito illa vitare potuisset.

Post de gravioribus moneendus.

9 Injungat ut deinceps frequentius eum adeat: hoc enim sibi futurum gratissimum: communicatio enim nutriet fiduciam & amorem: non dubitet se diligi ut filium carissimum; utinam paterent corda, sic enim evanescerent cuncta, quæ hanc suspicionem, & diffi-

Hortetur ut Superiorem frequentius adeat.

1. Ioan. 3.
18.

diffidentiam ingenerant : & ne putet se verbo & lingua tantum diligi , experiatur , ut videat se diligi etiam opere & veritate ; proponat quæ cupit. Si possit sine maiore incommodo , concedat Superior alacriter : si habeat difficultatem in iis concedendis, tunc infirmo præmonito , communicet cum Admonitore , vel Consultore : qui si annuat , nec manifestum sit incommodum , concedet : si neget, excusabitur , quia aliorum etiam iudicio permittendum non erit. Si per aliquem, cui magis fidat, velit agere cum Superiore , poterit initio indulgere: interdum tamen si res ejusmodi sit, ut concedi debeat , significandum Interpreti , ut is qui petit , Superiorem adeat , Superiorem sine dubio facturum quod petitur.

*Quomodo
credenda
quæ referun-
tur.*

10 Et si vigilandum est Superiori , cum iis maxime , qui majori indigent cura ; videat tamen cum hoc infirmo quæ & quibus de eo credat : audiat quidem, sed perpendat omnia : proclive enim est , ut de eo, qui non recte ambulat , de quo putant Superiorem non habere optimam opinionem , esseque inter cos vicissim aliquam offensionem , multa ad eum deferantur non ita explorata , interdum etiam exaggerata. De iis, si absque diligenti cautela infirmus moneatur , mirum quantopere noceat, quantopere hinc morbus crescat ; quantam occasionem sumat is, de quo agitur, infirmandi cetera , quæ obijciuntur ; accusandi Superio-

rio-

riorem nimiae credulitatis , quam etiam ex amaro affectu erga se proficisci & credet & prædicabit.

11 Hoc ipsum ei , cum arguitur , prædicendum , hæc quidem esse delata , se tamen non facile credere quæ dicuntur : cupere proinde ab eo cuncta cognoscere , idque ne putet ille , se ex præjudicio damnatum , quod caveat diligenter Superior ne præ se ferat. Et quamvis alioqui de re constaret , audiat tamen antequam damnet ; efficiatque , ut intelligat ille , sibi plane persuadeat (quamvis pro ratione sui officii , & pro bono subditi , atque communi , necessario audiat & investiget) tamen sibi gratius longe futurum , si innocens , quam si culpabilis inveniatur. Quis enim pater , qui filii culpa vel infirmitate audita , non libentius inveniatur unde gaudeat , quam unde puniat?

12 Iniungat illi aliqua , quæ sine magno detrimento poterit : mittat interdum , si id ille præstare poterit , ad concionandum ; ad exhortationes monialium , ad negotium aliquod cum Prælato , vel aliquid aliud transigendum ; ne arbitretur omnino sibi ex diffidentia ad omnia ostium occludi. Hæc tamen non ita ordinarie fient aut frequenter , ut incommoda incurrantur vel familiaritatis cum Principibus viris , vel quasi ejus personæ nimiae approbationis , quæ postea Societati , si res non bene
suc-

*Ut se gerat.
cum defectibus
deferuntur.*

*Ejus opera
& quomodo
utendum.*

succedet, aliquando nocitura sit (nam hujusmodi homines solent interdum nostris contra nos armis & testimoniis pugnare) sed prudenter & per intervalla tantum, ne ille putet se penitus abjectum. Postea, ubi rationem reddiderit rei gestæ, laudandus erit & animandus; hæc enim valde conciliant animum, & suspiciones evellunt.

Omnia Superiori censenda.

13 Postremo nihil prætermittat per se, & per alios idoneos, quod ad eximendas suspiciones, & gignendam amoris sui opinionem facere possit: certus, nisi hoc fecerit, nulla medicamentorum genera profutura: memineritque sententiæ D. Gregorii, quam Sanctus ille Pater, & ex longa experientia didicerat, & ex Sacris litteris exemplo confirmat Apostoli; qui objurgaturus graviter Corinthios, ita eos ante laudavit, ut post plurimas laudes intulerit, *Ita ut nihil vobis desit in ulla gratia.* Sed, ut Sanctus hic ait, prius superborum brachia studuit per blandimentorum vincula religare, ut postmodum potuisset vulnus superbiæ ferro correptionis incidere. Erant profecto in Corinthiis & quæ laudari debuissent, erant & quæ argui. Peritus itaque medicus prius sana membra, quæ circa vulnus erant, laudando palpavit; & postmodum puridum sinum vulneris feriendo transfixit. Hactenus Beatus Gregorius.

1. Cor. 1.7.
Lib. 24. moral. c. 9.

Secularitas, & aulicissimus insinuans in familiaritates, & gratiam externorum.

CAPUT XV.

MORBUS hic in Societate & intra & extra periculosus est, & istis qui eum patiuntur, & nobis fere nescientibus paulatim subintrat, specie quidem lucrificandi Principes, Prælatos, Magnates, conciliandi ad Divinum obsequium hujusmodi homines Societati, juvandi proximos, &c. Sed révera quærimus interdum nos ipsos, & paulatim ad sæcularia deflectimus. Quare diligenter prævenienda sunt mala, & initiis occurrendum.

Quam faciem induat aulicissimus.

I Attendenda igitur signa, quibus dignosci morbus hic possit. Ea autem inter cetera non obscure illum indicant, si quis frequentius illos adeat: si, cum abstinet, sentit desiderium præsentiae, & congressus illorum: si eorum rebus & negotiis tamquam propriis se affici sentiat: si libenter amplectatur negotia sæcularia: si Superiore in scio tractet: si hujusmodi Principes & Magnates sibi, non Societati conciliet: si observantia & obedientia incipiant illi fordescere: si Societatis ministeria, & quæ minus

Signa aulicissimi.

G

specio-

speciosa videntur, leviora putet : si se factum arbitretur ad magna : si paupertatem nostram incipiat moleste ferre, quod commoditates & curiosiora requirat : si nostrorum conversationem, præsertim simplicium, aspernetur : si Superiorem hæc monentem, quasi malevolum & invidum iniquius ferat. Hæc enim & hujusmodi si adsint, quidquid decepta & deceptrix illius intentio huic polliceatur, certum est morbum illius animum occupare.

*Indicanda
pericula.*

2 Indicanda erunt ei pericula. Nam obedientia, fraterna unio, simplicitas religiosa, devotio, & conjunctio cum Deo, amor erga Societatem, zelus animarum, & plurimæ aliæ virtutes manifeste periclitantur. Vix enim credi potest, quam hic homo immutetur: & brevi, cum minime sentiet, inveniet & dolebit se alium. Vnde in quinta Generali Congregatione tam serio ea de re actum est, ut videre est Canone 12. & 13. qui maxime servandi.

Statim amovendi hujusmodi homines.

3. Avellendi hujusmodi homines tempestive bono aliquo nomine : quia si incipiant altiores radices extendere, non poterunt sine magna Principum offensione divelli. Quare Superiores locales moneant tempestive Provinciales; qui si videant difficultatem, consulant Generalem. Denique non sint Superiores hac in re negligentes, si consultum Societati volunt.

Quid quan-
do se excu-
sant.

4. Si excusant se, quod Principes urgeant, hor-

hortandi serio, ut ipsi tamquam sua sponte fila præcidant; quod si voluerint, haud dubie suaviter id facient: tantum caveant, ne videantur, cum contra sentiant & cupiant, id circo id facere, quia Superiores volunt, & quia hoc nomine ab hominibus Societatis male excipiantur. Si enim hoc modo fiat, nocet potius causæ & Societati, quam profit, & Principum animos valde exulcerat. Quo fit, ut hæc eo modo pertractare, hominis sit nec obedientis, nec Societatem amantis, cum hæc incommoda manifeste videat.

5 Occupandi erunt diligenter in ministeriis, tum quod in his fructuosius proximis, tutius sibi, & majori cum Societatis ædificatione versentur; tum ne tempus suppetat hujusmodi visitationibus, & inutilibus colloquiis. Visitationes etiam interdum diserte negandæ, ut in Instructionibus cavetur impressis. *Occupandi in ministeriis.*

6 Publicæ etiam in Refectorio reprehensiones monebunt eos religiosæ humilitatis, ut aulicissimum quoquo modo interrumpant: quare circumspecte & opportune suo tempore adhibendæ. *Publice reprehendendi.*

7 Monendi subinde, rem esse plenam invidiæ apud externos, Societatem hoc nomine male audire, conflari multorum in nos odium, inter nostros etiam nescio quid inæqualitatis offendere: hortandi ut prudenter de-

clinent; suggerant nonnullis in rebus Principibus ipsis aliquos alios nostros vel externos, prout res feret, ne videantur nostri omnia movere.

Etiam externis dementi.

8 Externis, qui vel sua sponte, vel etiam ab huiusmodi nostris missi, Superiorem urgent, ut illis hoc vel illud negotium demandet, modeste negent, prætexentes Principis ipsius offensionem, Societatis decreta, negotii sæcularitatem, aliorum odium, & huiusmodi multa, quæ impediunt ne Superior possit hoc probare, si id illi faciant, tantum abest, ut possit injungere.

Generalis quoque monendus.

9 Postremo quoniam morbus mixtus est ex effusione ad exteriora, & amore excellentiæ, de quibus diximus cap. 6. & 7. applicet Superior pleraque remedia ex illis, & Generalem admoneat.

Pertinacia & durties Iudicii cum contentione.

C A P V T XVI.

*In speculativis adhibendi Doctores.
Exam. c. 3.
§. 10. & 11.*

1 SI fuerit in speculativis, adhibeat Superior iudicium aliquorum Doctorum. Et ubi is fuerit diligenter auditus, imponat ei silentium juxta obligationem Constitutionum, nec

nec sinat longius progredi, alioqui nec pauca nec parva sequuntur incommoda.

2 In practicis moneat illum, hoc fere nasci ex superbia, qua velit aliis videri doctior vel superior, & nesciat cedere; vel ex tenuitate iudicii, quod non apprehendit saltem non esse in rebus moralibus tantam evidentiam, ut non modo sit habenda ratio etiam iudicii aliorum, sed etiam prudentiores proprio confisi iudicio, decepti pravissime fuerint.

*In practicis
de quibus
monendi.*

3 Doceat esse interdum quæstiones de nugis & rumoribus, qui narrantur: quam vero indignum sit religioso homine de iis certare, & caritatem lædere, facile quivis intelligit.

Nugas interdum esse doceat.

4 Monendus quod Cassianus ait, Sicut inter carnales de terrenis substantiis, ita inter spirituales pro diversitate intellectuum oriri discordiam. Legat proinde diligenter egregiam ejus loci doctrinam, præsertim à cap. 6. usque ad 12. Si vero sit Coadjutor, dicat illi Superior vel Præfectus aliqua in hanc sententiam.

*hortandus
ad Cassianum
legendum.
Cassia. coll.
16. à c. 6.
usque ad
12.*

5 Adhibeat remedia communia orationis & examinis particularis, assumendo levem aliquam poenitentiam, quoties in leviora incidit.

*Communia
remedia ad-
hibenda.*

6 Ne contentiones hujusmodi permittantur impune, dentur reprehensiones publicæ in Refectorio cum admonitionibus, quæ alios etiam juvent. Et si Minister vel aliquis Pater ex gravioribus adesset, cum hæc contingunt,

*Non abeant
impune.*

posset commode sermonem ad alia transferre ;
& fratrem opportune monere.

*Quomodo
juvandus
non emenda-
tur.*

7 Si quis monitus non emendaretur , as-
signandi essent maturiores & magis spiritua-
les , cum quibus in recreatione ageret , ne ibi
contenderet. .

*Quid cum
res est cum
Superiore.*

8 Si res fuerit cum Superiore, jam defectus
est Obedientiæ ; proinde adhibenda remedia,
quæ in tertio capite.

*Perturbatio pacis, & seminatio discor-
diarum & jurgiorum.*

C A P V T X V I I.

*Morbi gra-
vitas consi-
deranda.*

Iac. 3.

I **A**NTE omnia plurimum proderit , si
gravitas morbi , quæ à plurimis parvi-
penditur , diligenter ab infirmo nec semel aut
perfunctorie perpendatur. Consideret itaque
quam multa , quam gravia , quam exaggerate
de peccatis linguæ Scripturæ sacræ loquantur :
nam præter ea , quæ D. Iacobus Apostolus
tam graviter tertio capite suæ Epistolæ posuit
(ut linguam appellet universitatem iniquita-
tis , & asserat maculare totum corpus , & in-
flammaré rotam nativitatis nostræ , inflamma-
tam à gehenna) in libris Proverbiorum &
Ecclesiastæ frequentissime de eo monemur :

&

& potest quisque multa sibi loca conquirere, quibus veluti stimulis sese pungat. Sed certe Eccli. 28. Ecclesiastici 28. tam multa mala narrantur, ut mirum sit, si quis ea legat, & non contremiscat.

2 Ex Sanctorum exemplis & eorum di- Exempla Sanctorum perpendenda. &is ejusdem morbi gravitas perpendi potest. Mirum enim est, quantopere linguæ lapsus & formidaverint ipsi, & aliis formidandum ostenderint. Mira sunt, quæ sibi injunxerunt, quæ fecerunt, quæ pertulerunt, ut linguam domare possent. Sed his describendis non est hic locus. Ceterum illud valde perpendendum, quod D. Basilus cum de spiritualium morborum curatione agit, quomodo contraria contrariis curanda sint, murmurationem gravissime punit, separatione videlicet ab aliis, & ut nemo ex fratribus cum ipso in opere esse velit. Quin etiam addit in detestationem tanti mali, ut opus quod ille laboravit, cum aliis ne misceatur: & quod magis mirandum est, postquam ille humiliter poenitentiam egerit, & eo morbo liberatus fuerit, admitti quidem posse tunc illud opus, sed ne tunc quidem in usum fratrum erogandum, verum in alium aliquem, propter rationem supra allatam, quam attulit Interrogat. 29. quod ex admissione ejusmodi operis, non sinatur ille advertere quantis in malis versetur. Indicat quippe hic sanctus Pater, ita terrendum hominem,

S. Basil. reg. fus. disput. Interrog. 51.

Ibidem Interrog. 29.

ita confundendum, ita sui facti turpitudinem edocendum, ut vel ex eo, quod ne labores quidem illius recipiantur, intelligat ubi jaceat. Quod totum certe sine suspiriis legi non potest. Sed mirum est quanto cum animi sensu S. Chrysostomus damnet & deploret hoc vitium, ut & abundantissimos lacrymarum fontes ex oculis laxare cupiat; nec tamen ullum fore luctum tantæ, ut ipse loquitur, tragædiæ condignum putet. Mirum est quam subtiliter tanti criminis naturam, causas, malitiam, signa, indignitatem, damna, remedia describat. Si naturam spectes, nihil aliud hoc esse ait, quam sibi invicem insurgere, in seipsos morsus laniatusque convertere, in suam carnem voracitatem exercere, sagittas verborum in fratres, imo acriora sagittis vulnera, infligere, gladium denique in animam ipsam acüere. Si causas; cupiditatem & invidiam notat, & eas quidem mendacio fallaciæque subnixas. Si malitiam; fratricidio & sacrilegio comparat: fratricidio quidem cum fraternam societatem, usque ad charitatis interitum lædat: quod cædis instar à Caino factæ, tanto est iniquius, quanto consanguinitas ipsa sublimior: sacrilegio autem cum ipsum Christi corpus quodammodo violetur. *Intelligas, inquit, cum in fratrem contumeliam dixeris, Christi te membrum vituperasse.* Si signa; *Possunt, inquit, in vobis hæc recognosci, cum quisque proximi auribus verba insusurrat, obicetur-*
que

Tom. 5. ser.
de laude
Dei.

Ejus vii
naturæ.

Causæ.

Malitia.

Signa.

que statim si quis propius accedat, & de medio tollitur
 occipit sermo. Et paulo post, Vnde complures, in-
 quit, reperies gentili potius quam Christiano se cre-
 dere. Si indignitatem; eo magis, inquit, queror
 vos sub eodem tecto, templo, pastore, tot re-
 bus ad concordiam provocantibus, discordes
 tamen, & seditiosos existere. Si damna; Primo
 sequi ait, caritatis interitum, deinde consequen-
 ter Deum è medio quodammodo profugere:
 ut enim ubi duo vel tres congregantur in no-
 mine ipsius, ibi est in medio eorum; ita cum
 duo vel tres in pacis everfionem conveniunt,
 ibi medius esse recusat. Tertio, fraternum no-
 men, quo nihil dulcius aut carius, tenue admo-
 dum & exile relinqui ac prope extingui. Po-
 stremo à nobis ipsis animarum quasi civile exi-
 tium induci. Si enim, inquit, fuerimus in nos sem-
 per armati, nulla erit demonū industria ad nostrum
 exitium necessaria. Si denique remedia; suadet ut
 divinæ Eucharistiæ mensam revereamur, ubi
 pacis victima Christus apponitur: ut injuria
 etiam laceffiti, toleremus tamen & ingemisca-
 mus, non quidem injuriæ gratia, sed ob eam in-
 ferentis interitum: & ad extremum ut fructum
 qui ex injuriarum tolerantia nascitur, cogite-
 mus. Has omnes hujus Patris sententias libuit
 in pauca colligere, cum necesse minime fuerit
 tam longum hic illius sermonem referre, quem
 tamen utilissimum erit perlegere; illudque in
 primis perpendere apud quos dicat: si enim

Indignitas.

Damna.

Matth. 18.
20.

Remedia.

tam graviter ferebat ista vir sanctissimus in iis , qui sola Christiani nominis societate conjuncti erant ; quid de illis existimandum , qui arctissimo præterea religiosæ caritatis & unitatis vinculo astricti sunt ? Sed prætereunda non sunt quæ D. Bernardus in eandem fere sententiam egregie dixit. Ac sermone quidem 29. in Cantica, *Proinde, inquit, dilectissimi, pacem habete ad vos , & nolite lædere invicem, non facto, non verbo , &c.* Legatur locus. Et sermone 24. in illud , *Recti diligunt te : Videas ambulare seorsum, &c.* Vbi conventicula & detractiones graphice describit. Sed sermone de triplici custodia manus, linguæ, & cordis, ita rem exaggerat, ut dicat : *Nec vero ejusmodi linguam , ipso etiam mucrone, quo Dominicum latus confossum est, crudeliorem dicere verearis. Fodit enim hæc quoque Christi corpus, & membrum de membro, nec jam exanime fodit , sed facit exanime fodiendo. Ipsi quoque nocentior est spinis, quas illi tam sublimi capiti furor militaris imposuit : seu etiam clavis ferreis, quos sanctissimis manibus illis & pedibus consummatio Iudaicæ iniquitatis infixit. Nisi enim hujus, quod nunc pungitur & transfoditur, corporis sui vitam illius vitæ corporis prætulisset, numquam illud pro isto mortis injuriæ, crucis ignominie tradidisset.* Et D. Augustinus vehementer matrem collaudat, quod numquam alteri de altera proderet, nisi quod ad eas reconciliandas valeret. Aitque se experientia doctum, turbarum & miseriarum, quas

S. Ber. ser.
29. in Cant.

Cant. 1. 3.
S. Ber.
serm. 24.

Idem serm.
de triplici
custodia.

S. Aug. lib.
9. confess.
c. 9.

quas lingua excitat, non parum hoc bonum aestimare. Et subdit: *Animo humano parū esse debere inimicitias hominū nec excitare, nec augere male loquendo, nisi eas etiam extinguere bene loquendo studuerit.* Quid igitur Religiosis faciendum?

3 Ex damno & perturbatione eorum quibuscum viuunt, morbi gravitas intelligitur: evertunt enim pacem, animorum tranquillitatem, obedientiam, & ministeria etiam æ fructum in proximis opinione nostrorum quoquo pacto diminuta, non leviter impediunt. Nec solum eo tempore quo loquuntur, & iis personis, cum quibus agunt, nocent; sed lædunt plurimos etiam absentes, & post multos annos, quia rumores & suspiciones in alios & alios derivantur: nec in ea domo, ubi quis est, tantum ejus amoris & opinionis detrahitur, sed manat per Provinciam, imo per provincias, ubi post multos annos longissime positus inveniat ille à se abalienatos animos eorum, quibus nec nocuit umquam, neque convixit. Quod si obedientia illum præfecerit, miseri subditi ex præjudicio, & sinistra illa opinione, & conqueruntur ipsi, & torquent Superiorem, ut nec fiducia, nec reverentia, nec amor in iis locum habere possit. Ut merito in ejusmodi detractores, qui venenum tam late diffundunt, illud Scripturæ aptari possit: *Vae qui potum dat amico suo mittens fel suum & inebrians, ut aspiciat*

Intelligitur gravitas ex damno proximi.

Hab. 2. 15.

nu-

Serm. de
vita spirit.
n 39. tom.
1.

nuditatem ejus. quod de hac re egregie explicat B. Ephræm. Etiam maxime juvat, si attendatur facilitas incurrendi hoc peccatum ex linguæ volubilitate: quo enim facilius peccatum aliquod incurritur, eo diligentior ibi custodia adhibenda est. Et certe si quis gravem aliquam infirmitatem corporis ex linguæ lapsu accerseret, quam vigilans esset & quam cautus? Et tamen in animæ periculo dormitamus. Imo vero in re levissima si quis ex defectu linguæ in pronuntiatione alicujus dictionis errare sole-
ret, quod eam recte proferre non posset; si huic publice agendum esset, quam caute dictionem illam vitaret, ne linguæ vitium prodere cogeretur? Quanto ergo magis illæ cavendæ sunt voces, in quibus lingua gravius peccat? nec tam corporis, quam mentis vitium manifestat? cum illud culpa careat, hoc neque culpa non levi, nec poena carere possit.

Non satis est
bona inten-
tio.

4. Intelligent non esse ad excusationem satis, si id non ex intentione faciant, & formali studio detrahendi aut Societati aut aliis: quia ex natura rei eadem sequuntur mala, quocumque tandem animo illud dictum fuerit; nec Societati & aliis minus propterea incommodi evenire: quia cum sciat se facile labi, debuisset attentius custodiam ponere ori suo; sicut & qui vim vini & potus expertus, iterum inebriatur, non excusatur à culpa, quia debuisset, potuissetque cavere.

Psal. 141.

5 Si erga aliquem sentiat se esse male affectum, de eo rebusque illius ne loquatur, nisi oratione & præparatione præmissa: nam facile ex abundantia cordis os loquitur, & de malo thesauro non profert bona.

*Quid si se
male affe-
ctum sentiat.
Matth. 12.
Ibidem.*

6 Si quando labatur, ipse ultro sese Superiori, vel Confessario statim deferat: & caveat ne ea nocte cubitum eat, priusquam confessione se abluerit: tum ut, si forte mortale subsit, in peccato ne dormiat; tum etiamsi non esset; facilius veniam impetret & medicinam. Quod si faciet, maximum sine dubio præsidium sentiet.

*Statim la-
psus Supe-
riori ape-
riendus.*

7 Fugiat tamquam venenum, eorum colloquia & conversationes, cum quibus errare solet: nec de rebus ad alios pertinentibus, maxime vero ad gubernationem, nisi valde circumspecte & paratus loquatur, etiamsi forte leve id quod dicitur, sibi videatur, nec quidquam mali suspicetur.

*Vitanda qua
sunt in cau-
sa.*

8 Vbi in eo erraverit, excipiat à Superiore gravi aliqua obiurgatione & commemoratione aliquorum, quæ hic dicuntur. Crescit enim morbus hic, si quis alius, ex indulgentia & defectu correctionis ultra quam credi possit. Mulctetur interdum pro qualitate culpæ, nam & Salomon admonet: *Mul-* *Prov. 21.*
Etato pestilente, sapientior erit parvulus. Si tamen *11.*
contra personam ipsius Superioris fuerit murmuratio, servanda erunt quæ dicta sunt de
ten-

tentatione contra Superiorem cap. 14. numero 5. & 6.

*Quid si res
non erit pu-
blica.*

9 Nisi res fuerit valde publica, & scandalum potius ob dissimulationem nascatur, non erit de huiusmodi in publica reprehensione & parva mensa reprehendendus, nisi forte in genere de inordinata & indisciplinata locutione & murmuratione. Sed monendus discrete, id publice non fieri, quia valde scandalizaret, si sciretur, hoc eum dixisse: ideo graviolem arbitretur culpam. Bonum tamen erit, si is coram quibus dixit, se humiliet, dicta retractet, culpam dicat, & de scandalo veniam petat.

*Relationes
contra alte-
rum perni-
ciosa.*

10 Referre alteri de altero, quod charitatem lædat, non perniciosum tantum, sed diabolicum arbitretur; & recordetur, quomodo Constitutiones huiusmodi homines appellent, videlicet Pestem; quid in eos statuant, id est, ut separentur vel à Domo, vel etiam à Societate. Nec dissimilem sententiam tulit S. Basilii, ubi ait: *Qui detrahit fratri, vel detrahentem auscultat & tolerat, quia hic animadversione dignus est?* respondet: *Exterminandi à reliquorum societate ambo: Detrahentem enim secreto proximo suo, hunc persequabar. Et alibi dictum est: Detrahentem nolito libenter audire, ne substollaris.* Et addit Interrogatione sequenti: *Si verò Antistiti etiam detraxerit, quo pacto cum illo nos geremus?* respondet: *Manifestum est hoc quoque iudicium ex*

*S. Basil. reg.
brev. reg.
26.*

Psal. 100. 5.

ira

CAP. XVII. De seminatione discordiarum. III

ira Dei adversus Mariam, quando detraxit Moysi, Num. 22. cuius peccatum ne ipso quidem Moyse deprecante, inultum dimisit Deus. Et de huiusmodi videtur dixisse Salomon: Ejice derisorem (sive pestilentem, eadem quippe vox est) & exibit cum eo iurgium. Nisi enim serio tales emendentur, iurgia & dissensiones proculdubio deesse non poterunt.

Prov. 22: 10.

II Investiget ipse infirmus diligenter huius morbi causas. Sunt enim qui detrahunt ex aliqua aversione in alium concepta, de quo dulciter quasi loqui nesciunt. Sunt qui ex quadam vanitate aliis detrahunt, alios iudicant, & de omnibus decernunt, probantes, improban-tes, quasi soli sapientes. Sunt qui ex invidia, & aliorum factis detrahunt, & ut ait S. Hieronymus, aliorum lucra sua damna reputent. Sunt qui animo Superiorem taxandi, quod hunc vel illum præponat, quod fere ex eadem invidia & superbiæ radice prodit. Hic autem invidia morbus, qui mortiferi basilisci morsus est, quam sit periculosus, & ad curandum difficilis, egregie docet Cassianus Collat. 18. cap. ult. quod diligentissime perlegendum est. Ex his atque aliis huiusmodi, cum detractiōnis vitium oriatur, ibi medicinam apponat, ubi viderit esse huiusmodi infirmitatis pestiferam, sed feracem valde radicem.

Ab infirma causa investiganda.

Cass. Coll. 18. c. ult.

12 Videat quam miserum sit, cum cetera Religionis onera portet, exponere se tam probabili

Periculum cui se exponit.

babili periculo perdendi frequenter omnia, si incidat in mortale, quod in huiusmodi facile est. Quod si Deū graviter offendere, imo vel suggerentem Satanam sustinere, non modo Religioso, sed Christiano homine indignū est; quid censendum, si ea omni custodia non vitemus, ex quibus id facile cōsequetur? Revera tremendū. Sed quos minus hæc sollicitudo pungit & urit, retineat saltem laborum & meritorum iactura, difficultas pœnitentiæ, & labor resurgendi.

*Examen
particulare
& alia id
genus.*

13 Ad examen particulare cum aliqua pœnitentia, quoties ceciderit, orationes & lacrymas serio confugiat, sciens quod ad periculum cadendi, & aliorum damnum attinet, periculosus se hoc morbo, quam contra castitatem tentari: & tamen ex ista tentatione, quomodo humiliatur, quomodo omnia tentat, non omittit disciplinas, orationes, Sacramentorum frequentiam? In lingua vero, quasi nullum esset periculum gravioris casus, tam facile prolabimur. Evellendus omnino hic error ab animo, & diligenter periculum præcavendum.

*Odio sus fit
omnibus.*

14 Videat attentius, quam odiosus fiat omnibus, qui in eadem domo versantur, forte etiam illis ipsis apud quos loquitur. Sed parum est. Quid si gravius illud addatur, quod Apostolus ait, *Detrañlores Deo odibiles?* Quid miserum magis, quam Deo & hominibus esse odiosum? & postea in ore suo huiusmodi misera-

Rom 1. 30. *biles complacunt.*

Psal 48. 14.

*Superiores
servanda
responsa ad
Romanam
Congr.*

15 Postremo fervet Superior quæ habetur in Responsione ad quamdam Congregationem Provinciam anni 1590. quæ sic habet: Primum quidem occasiones captare debent (id est, Superiores) in domesticis exhortationibus, quæ ad nostros haberi solent, ac serio inculcare, quantopere hoc vitium conscientiae, pietati, ac paci noceat. Secundo, ut præter communes syndicos, nonnulli occulti adhibeantur, qui in particulari de hoc vitio referant; & ut delinquentibus in eo vel poenitentiae, injungantur publicæ, vel correctiones, secretæ, prout res tulerit, adhibeantur. Tertio, Confessarii poenitentes serio moneant in his graviter peccare posse. Et si quidem detractio fuerit mortalis, referat ad Superiorem, juxta Ordinationem decimam quartam ex viginti duabus quas Kalend. Augusti 1590. ad Provincias misimus. Si tamen casus mortalis non fuerit, moneant illum serio, poenitentiamque injungant, ac remedia tum particularis examinis, tum alia proponant. Possunt etiam eos in privatis colloquiis extrâ confessionem mone-
re, ut à consuetudine eorum, si quos no-
verint aut viderint in hoc vitium impin-
gere, diligenter caveant. Quarto, quoniam
non raro multam præbet occasionem hujus-
modi querelis & obmurmurationibus scire
quid in consultationibus dictum aut deter-
minatum sit; ratio habeatur quam diligen-

tissime, ut Consultores servant secretum, juxta officii sui regulam. Quinto, plurimum nocet, si Admonitor & Consultores ita cum accedentibus & contristatis agant, ut spe illos fovendi & juvandi, ea de Superioribus dicant, ut dolentium querelas approbare, atque idem quod illi de Superioribus sentire videantur. Hoc enim modo etiam contra illorum intentionem foveantur querelæ & murmuraciones, & confirmantur magis. Sed ita accedentes amanter excipiant, & patienter audiant, ut Superiorum auctoritatem & amorem servant. Non enim deerit modus consolandi eos, qui in amaritudine sunt, etiam operam suam apud Superiorem promittendo, modo caritas & prudentia ac necessaria in verbis circumspectio non desit. Sexto, moneantur inter nostros selectiores nonnulli, qui si quid tale in nostrorum Collegiis viderint irrepere, id impedire, sermonemque divertere curent, vel meliores interponendo sermones, vel suaviter & amanter dicendo non esse tutum simile quid proferre. Septimo, intelligant etiam nostri, tum in exhortationibus, tum à Confessariis, & serio doceantur, in detractiōe & murmuratiōe facile esse lethale peccatum. Et quamvis in particulari ex circumstantiis fieri possit, ut culpa non eo pertingat, tamen ex natura rei, si non semper mortaliter, fere tamen graviter peccari: exempli gratia, cum malam de Prælati opinionem subdi-

torum

CAP. XVII. De *seminatione discordiarum.* IIS

torum animis per huiusmodi verba inserimus ,
vel bonam evellimus ; aut quovis modo ipsos
à Prælatiſ alienamus ; cum Obedientiæ vires
& ſimplicitatem enervamus : cum diſſidia , ſi-
multates, & animorum averſiones inter fratres
ſeminamus : cum communem pacem, tranquil-
litatem & regularum diſciplinam perturba-
mus. Qua de re B. Bernardus pulchre ſic ait
de Religione loquens : *Proditores ſunt quicum-
que in hoc Domini caſtrum inimicos ejus introduce-
re moliuntur : quales ſunt utique detractores , Deo
odibiles ; qui diſcordias ſeminant, nutriunt ſcanda-
la inter fratres. Sicut enim in pace factus eſt locus
Domini , ſic in diſcordia locum fieri diabolo mani-
feſtum eſt. Non miremini fratres , ſi durius loqui
videor, quia veritas neminem palpat. Omnino pro-
ditorem ſe eſſe noverit, ſi quis forte (quod abſit) vi-
tia quælibet in hanc domum conatur inducere , &
templum Dei ſpeluncam facere dæmonum. Gratias
Deo non multos hic invenimus huiuscemodi. Sed
tamen deprehendimus interdum forte nonnullos , qui
colloquantur hoſtibus , & paciſcantur fœdus cum
morte, hoc eſt, moliuntur quod in eis eſt, imminuere
Ordinis diſciplinam , intepeſcere fervorem , turbare
pacem, lædere caritatem.*

S. Ber. ſer.
3. de dedi-
cat. Eccleſ.

Rom. I. 30.

Pſal. 75.

Melancholia, scrupuli, &c.

C A P V T XVIII.

DE hoc morbo tam multa, tamque utilia à multis conscripta sunt, ut non sit necesse plura dicere.

*Quinam le-
gendi.
Gers. tract.
contra pu-
fill. p. 3. &
de præpar.
ad Missam.*

1 Legi poterit Gerson tract. contra Pusillanimitatem, parte tertia, & de præparat. ad Miss.

*Quomodo
juvandi.*

2 Hi ordinarie fovendi, amanter excipien- di, animandi, nec illis dubie, aut cum hæsit- atione loquendum, sed clare: Nihil hoc; Mit- tat ista securus, Ne repetat; Hoc facito; Ego rationem reddam Deo, &c.

*Scrupulosi;
circa pecu-
liaria ob-
iecta.*

3 Illud tamen præterendum non est, esse interdum aliquos, qui non ex nimis timorata conscientia in scrupulos vergant, sed peculiari aliqua ex causa circa unum aut alterum obje- ctum cum sint anxii & scrupulosi, in reliquis tamen minime timorati, & indisciplinati inve- niuntur. Experti enim sumus alioqui spiritua- lis profectus & religiosæ observantiæ valde negligentes, & sine scrupulo multas admitten- tes imperfectiones, ob quas tandem è Societate dimittendi fuerint; qui tamen in nonnullis anxie nimis & scrupulose agentes, finem num- quam faciebant confessionibus generalibus, fa- cultatibus

cultatibus petendis, & hujusmodi. Quod ideo dicendum fuit, ne tales homines semper foveantur, & eorum conscientiae dilatentur, sicut cum scrupulosis agendum: sed ut discrete in iis tantum iuventur lenitate & indulgentia, in quibus indigent: in ceteris moneantur de laxitate, & ut videant hæc inter se non cohære: quinimo contingere posse, ut ex nimia negligentia & socordia hos scrupulos permittantur incurrere. Evigilent itaque cum fervore: animandi tamen cum dexteritate, prout ratio docebit.



I N D E X

R E R V M.

Amicitia.

Cum ex negligentia & otio.
ibid.

NATURA hujus morbi. pag. 56.
Remedia. 56. & 57.

Quid maxime fugiendum. 34
Cum ex nimis occupationibus. 35

Affectus peculiare vincendi. 58

Cum ex subtractione divina. 36

Quid cum carnis tentatione quis pulsatur. 59

Aversio à Fratribus.
Quid cum fuerint aversiones diuturnæ. 64

Amor excellentiæ & honoris.

Aversi per Confessarium & Superiorem reconciliandi.

Morbi superbiæ signa. 53

64. & 65

Superbiæ fructus. ibid.

Causa amaritudinis tollenda. 65

Remedia. 54. & 55.

Charitatis signa exhibenda. 66

Anima.

Si fuerint subitanea hæpationes. 68

Animarum curatio, quanto præstantior, eo difficilius. 9

Iratu quo modo accipiendus à Superiore. ibid.

Ariditas.

Quid Superiori faciendum, &c. 69. & 70

Examinanda. 29

Vide Superior. Aulicifmus.

Ejus causa. 30

Quam faciem induat. 97

Quid si longo tempore dureret. 31

Hujus signa. ibid.

Quid si in matutina oratione acciderit. 32

Hujusmodi homines statim amovendi. 98

Cum provenit ex inordinato affectu. ibid.

Indi-

Cum ex inopia materia. 33

I N D E X.

Indicanda pericula.	ibid.	sa, malitia, signa.	104
Occupandi in ministeriis.	99	Remedia.	105. & 109
Publice reprehendendi.	ibid.	Ejus gravitas ex damno pro-	
Etiā externis denegandi.		ximi attendenda,	107
	100	Relationes contra alterum	
Conscientia minime		perniciosa.	110
timorata.		Causa ab infirmo investi-	
E o morbo affectus qua-		ganda.	111
liter juvandus.	73	Pericula,	ibid.
Quid cum in re gravi pec-		Particulare examen adhi-	
cat.	ibid.	bendum.	112
Associandus alicui spiritali		Superiori servanda responsa	
viro.	74	ad Romanam Congrega-	
Exercendus in exercitiis spi-		tionem.	113
ritualibus.	ibid.	Distractio in oratione.	
Trepiditatis effectus.	71	Vide Ariditas.	
Profectus in spiritu exami-		Effusio ad exteriora.	
nandus.	72	Vide Exteriora.	
Semper perfectionis habenda		Exteriora.	
ratio.	73	A d ea effusio, & effu-	
Devotio.		sionis causa.	49
Q uinq; causa subtra-		Hujusmodi infirmus occu-	
cta devotionis ex S.		pandus in utilibus.	ibid.
Bonaventura,	36	De quibus monendus.	50
Decem & septem ex Gerso-		A visitationibus abstinem-	
ne.	37	dum.	ibid.
Quid in subtractione prae-		Sese frequentius colligat.	51
standum.	38	Frequentius orationi vacan-	
Diffidentia.		dum.	ibid.
Vide Superior.		Gubernatio.	
Discordiae.		R atio spirituales viros	
Hujus morbi gravitas.	102	gubernandi fortis &	
Exempla Sanctorum perpen-		suavis.	21
denda.	103	Hujus difficilis praxis.	ibid.
Ejusdem morbi natura, cau-		Quid Superiori praestandum	

I N D E X

ut utramque assequatur.	22	Quid cum infirmitas non apparet.	76
Insuavis gubernationis capi- ta.	ibid.	Alia remedia. ibidem, & seq.	
Remissa gubernationis capi- ta.	24	Iracundia.	
Asperitas & laxitas.	25	Vide Aversio.	
Quomodo conjungenda.	26	Institutum.	
In quo suavitas sit posita.	28	Tentatio contra Institutum.	80
Quomodo miscenda cum be- nignitate severitas, se- cundum Constitutiones.	29	Quomodo intelligendum. ibid.	
Honor.		Derogenda morbi gravitas.	81
Vide Amor.		Instituti sanctitas ostenden- da.	83
Impatientia.		Vestiganda radices.	84
Vide Aversio.		Solutio objectionum contra Institutum.	85
Inclinatio ad sensualita- tes & amicitias.		Infirmitas huiusmodi spiri- tualibus exercitiis iuvan- da.	86
Vide Amicitia.		Interdicendum, ne aliis com- municet.	87
Infirmitas.		Iudicium pertinax.	
Spiritualiter infirmi, suscepti dicuntur.	12	In speculativis adhibendi Doctores.	100
Quid si voluntas in infirmo desit.	49	In practicis de quibus infir- mis monendus.	101
Difficultas ex infirmi volun- tate quomodo curanda.	13	Remedia.	ibid.
Morbus agnoscendus.	14	Languor in spiritu.	
Infirmitas non facile dam- nanda.	75	Huiusmodi morbi reme- dia excitantia.	40
Eidem compatiendum. ibid.		Miseria huius status.	41
		Pericula.	ibid.
		Languor frigus anima.	42
		Vitia tepiditatis.	ibid.
		Exa-	

RE RIVM

<i>Examen huius languoris.</i>	43	<i>Animi preparatio ad quod-</i>	
<i>Remedia.</i>	44	<i>vis.</i>	<i>ibid.</i>
<i>Medicina spiritualis.</i>		<i>Quomodo in lectoribus af-</i>	
E ius præcepta.	10	<i>suascendum.</i>	48
<i>Nihil est incurabile.</i>	13	<i>Exercendus in difficilibus.</i>	
<i>Agnosendus est morbus.</i>	14		<i>ibid.</i>
<i>Medicamentorum congrui-</i>		<i>Interdum pie condescenden-</i>	
<i>tas.</i>	16	<i>dum.</i>	<i>ibid.</i>
<i>Opportunitas.</i>	17	<i>Quid si voluntas in infirmo</i>	
<i>Medicamenta suavitatis ad-</i>		<i>desit.</i>	49
<i>hibenda.</i>	18	<i>Oratio.</i>	
<i>Perpendenda ante curatio-</i>		<i>Ad eam confugiendum.</i>	14
<i>nem.</i>	19	<i>Vide Ariditas in oratio-</i>	
<i>Morbus.</i>		<i>ne.</i>	
<i>Agnosendus.</i>	14	<i>Profunditas.</i>	
<i>Modus indagandi morbum.</i>		O stium Diaboli.	61
<i>ibid.</i>		<i>Huius defectus exem-</i>	
<i>Morborum spiritualium ge-</i>		<i>pla.</i>	62
<i>nera sexdecim.</i>	20	<i>Pericula.</i>	63
<i>Morbi leviores signa gravio-</i>		<i>Remedia, Crebra conscientie</i>	
<i>ris.</i>	53	<i>restitutio.</i>	<i>ibid.</i>
<i>Quid cum infirmitas non</i>		<i>Lectio, & meditatio.</i>	<i>ibid.</i>
<i>apparet.</i>	76	<i>1 Scrupulosi.</i>	
<i>Alia remedia. ibid. & seq.</i>		<i>Quomodo juvandi.</i>	116
<i>Obedientia.</i>		<i>Sensualitas.</i>	
E ius pulchritudo & ne-		<i>Vide Amicitia.</i>	
<i>cessitas.</i>	46	<i>Spiritus languor.</i>	
<i>Legenda epistola B.P. Nostri.</i>		<i>Vide Languor.</i>	
<i>ibid.</i>		<i>Superior.</i>	
<i>Exempla Sanctorum colli-</i>		E ius obligatio.	11
<i>genda.</i>	<i>ibid.</i>	<i>Idem medicus spiritua-</i>	
<i>Causa repugnantie exami-</i>		<i>lis.</i>	<i>ibid.</i>
<i>nanda.</i>	47	<i>Ejus dexteritas.</i>	15
<i>Deus in Superiore agnoscen-</i>		<i>In Superiore novem requi-</i>	
<i>dus.</i>	<i>ibid.</i>	<i>runtur, que aromatum</i>	
		<i>H 5 nomi-</i>	

I N D E X.

<p>nomine explicantur. 16</p> <p>Se ipsum examinet. 19</p> <p>Aversio à Superiore. 87</p> <p>Quid in se disquirat Superior. ibid.</p> <p>Via tollendi suspicionem à subdito. 88</p> <p>Ferenda Superiori subditi imperfectiones. ibid.</p> <p>Spiritu caritatis iuvandus aversus. 89</p> <p>De murmurationibus contra Superiorem per alium monendus. 90</p> <p>A gravioribus Patribus iuvandus. ibid.</p> <p>Quomodo se gerat Superior in colloquio. 91</p> <p>De gravioribus monendus. 93.</p>	<p>Ad Superiorem frequentibus adeundum hortandus. ibid.</p> <p>Quomodo credenda qua referuntur. 94</p> <p>Subditi opera quomodo utendum. 95</p> <p>Quid Superiori cum iratis faciendum. 68. 69. & 70</p> <p>Superiori servanda responsa ad Romanam Congregationem. 113</p> <p style="text-align: center;">Tepiditas.</p> <p>Eius effectus. 71</p> <p>Vide Languor in spiritu.</p> <p>Item & Conscientia minime timorata.</p>
---	---

F I N I S.

Kotny 167031

